

तीतर चाकर



रचणिया : चन्द्र शेखर बेवश, ढालपुर, कुल्लू (हि० प्र०)



THARAH KARDU

-:- एक व्यथा - एक संतोष -:-

कुल्लूई भाषा-उस भाषा या बोली, आप इसे जो भी समझना और बोलना चाहें, हिमाचली पहाड़ी को एक अंग एक रूप है जिस में लिखी और छापी यह कविमय पहिली पुस्तिका कह सकता हूँ और जिसे लिखने छापने का प्रयास किया है हमारे हिमाचल के कुल्लूई रूप के एक सिने माने व्यक्ति और भाषा विद आदरणीय पुरोहित चन्द्र शेखर जी ने। काश्मीर से लेकर असम दार्जिलिंग तक हिमाचल के इस मू-भाग को पहाड़ी भाषी माना और कहा जाता है जिस में अपने-२ प्रदेशानुसार अनेक रूपों में बोला जाता है कि लिपी प्रायः राष्ट्र भाषा हिन्दी ही है, यह सिलसिला ना मालूम कितने युगों से ऐसे चल रहा है परन्तु पहाड़ों के भाग्य में आम तौर पर अपने पराए सभी के दिलों में एक हीन भावना बनी रही होगी जिस के फल स्वरूप इन बोलियों उप-भाषाओं को निज गौरव प्रगट करने का अवसर नहीं मिला और यहाँ के निवासियों ने भी राजनैतिक सामाजिक, साँस्कृतिक एवं आर्थिक पराधीनता के कारण इस ओर ध्यान देने योग्य नहीं बनने दिया। हम लोग आम तौर पर अपनी मातृभाषा या बोली में दूसरों के समक्ष बात करने से लजते रहे चाहे उनमें जीवन के प्रति हर प्रकार के भावों की अभिव्यक्ति करने के लिए इनमें शब्द भण्डार आवश्यकता से कितने ही अधिक क्यों न रहे हों। कितना दुर्भाग्य रहा है कि नाभी में कस्तूरी होते हुए भी मृग बन-२ दूँडता फिरता रहा। यही एक कामना थी जो मेरे मन में तब से काँटा बन कर खटक रही थी जब आज से संभवतः चालीस वर्ष पूर्व कुछ पहाड़ी मित्र लाहौर कालजों में पड़ा करते थे। यह कामना धीमी-२ कसक बर्ना दिलों में चुटकियाँ लेती रही साल हा साल और तब एक समय आया जब भारत माँ के पाँव की पराधीनता की बेड़ियाँ कटी-एक प्रकाश अपने संग सैकड़ों हजारों आशाओं की किरणें समेट चहुँ दिशाओं में फैकना आरम्भ हुआ.....उन में एक किरण इस आशय की भी कि अब हमें अपनी भाषा और संस्कृति को न केवल प्रकाश उस प्रकाश तक पहुँचने में सहामता मिलेगी वरन् हम समस्त पहाड़ी जनता को सभी प्रकार की अवनती से छुटकारा मिलेगा और हमें स्वाभिमान की इन मृदुल, सरस, शान्तिप्रद किरणों के प्रकाश में अपने जीवन को सँभारने, निखारने और प्रखरित करने का सौभाग्य प्राप्त होगा। और सचमुच ऐसा हुआ भी। काश्मीरी, डोगरी, पहाड़ी, किश्तवाड़ी, हिमाचली पहाड़ी और उस के

अनेक आंचलिक रूप, गुजराती, नेपाली, गढ़वाली, भोटी आदि बोली भाषाओं में जीवन की एक मधुर लहर जागृत होने लगी। भाषा विभाग बने, आकादमियों ने जन्म लेने आरम्भ किये और प्रकाश की हर नवीन किरण ने पहाड़ों के सांस्कृतिक जीवन में एक नया उल्लास अनोखी तड़प और घड़कन गूंजने लगी। साहित्यकार, लेखक, कविगण संगीतज्ञ, नर्तक आदि सब की रंगे भड़क उठी और समय के साज पर थिरकने लगे पांव और उंगलियों में विह्वत हो उठी लेखिनियाँ। कवि की उड़ानें और कलाकार की सुरताल में संजोई ताँने स्वतः शतशः कल्पनाओं को जनम देने लगी। पहाड़ी जन समाज को शायद पहिली बार यह एहसास होने लगा कि हमारी भाषा, कला और सांस्कृति में वह सभी कुछ है जो एक सभ्य समाज के पूर्वजों और पुरखों की अनमोल भाती कही जा सकती है। और जिसे हम अनभिज्ञता और विवशता के कारण भुला बैठे थे।

चालीस वर्ष पहिले की वह व्यथा शनै-२ हर्षोल्लास में बदलने लगी। पुस्तकें प्रकाश में आई, लेख लिखे गए, कविताएँ हृदय के मन सरोवर से धाराएँ बन कर बहने लगी जिसमें से एक धारा हैं यह पुरोहित चन्द्र शेखर जी की पुस्तिका "तीतर चाकर" जिसे वे आप को भेंट करने चले हैं। कुलूई बोली में भी बहुत कुछ लिखा गया है कालेज के होनहार विद्यार्थीओं में भी अपनी बोली के लिए सुन्दर और अदभुत भवनाएँ जागृत हो उठी और कालिज मैगजोन उन की सुन्दर कल्पनाओं को अभिव्यक्त करने लगे। परन्तु पुरोहित जी की बेबसी ने इस पुस्तिका के माध्यम से यह साबित कर दिया कि वे असल में किसी प्रकार भी "बेबस" नहीं है हाँ इतना अवश्य है कि उन के अंतराल में कुलूई शब्द भण्डार और उनको हर प्रकार के छन्दों में ढालकर हिमाचली व कुलूई समाज के समक्ष लाने में प्रत्यक्ष रूप में बेबस रहे वरना उन के बस में तो कविताओं, टप्पों, गीतों आदि का एक अथाह समुद्र है जिस की लहरें साहिल से टकराती रहीं और वापिस निराश जाती रही। यह उन्हें इस बेबसी को तोड़ने का पहिला मौका मिला है। मुझे मालूम है अभी उन के पास लेखों, नाटकों एकांकियों की भी कमी नहीं है जो लिखे पड़े हैं परन्तु जिन्हे प्रकाशित करने की उन की बेबसी बनी हुई है।

प्रस्तुत कार्य कैसे सम्पन्न हो सका यह उन्होंने स्वयं अपने पुस्तिका आरम्भ में दिया गया है जिसे दुहराने की आवश्यकता नहीं और हमारा कर्तव्य अब हमें पुकार रहा है कि हम पुरोहित जी को भविष्य में बेबस न रहने दें - यही नहीं दूसरे

साहित्यकार मित्रों और प्रियजनों को भी प्रोत्साहित करने के लिए कटिबद्ध हो जाए और यह हो सकता है अपनी बोली भाषा के प्रति सम्मान और गौरव की भावना हर एक कुल्लू निवासी भाई बहनों के दिलों में उत्पन्न करने से ।

कुछ और सज्जनों ने भी प्रयास किये हैं परन्तु जो बात मैं कहे बिना कदापि नहीं रह सकता वह कुल्लूई कविताओं को अनेक छन्दों में सभी रसों में एवं भावाभिव्यक्ति में सुन्दर, अनूठे और रहस्यमय सार्थक शब्दों के चयन में जिन्हें यदि ठीक लय और शास्त्रोक्त छन्दों के अनुरूप पढ़ा जाए तो बस आनन्द ही आ जाता है । साहित्य में छन्द लय और सार्थक शब्दों के चयन की उत्कृष्ट कला में प्रवीण शायद ये दूसरे व्यक्ति हैं । कांझड़े में पं० दुर्गा दत्त शास्त्री इन से पहिले एक संस्कृत नाटक को उन्हीं छन्दों में बांध कर प्रस्तुत कर बैठे हैं ।

बेबस के बस में अभी बहुत कुछ है । इन के इस कार्य को ऐसी कुशलता से प्रकाश में लाने के लिए वे बधाई के पात्र तो हैं ही, हम चाहते हैं उन का जितना लिखित साहित्य बाणी है उसे प्रकाश में लाने के लिए आप स्वयं तथा साहित्य कला संगम कुल्लू को सहयोग और सहायता प्रदान करें— यह मां सरस्वती की आराधना से कम नहीं होगा । “साहित्य कला संगम” कुल्लूई संस्कृति, भाषा एवं कला को राष्ट्रीय एवं अंतर-राष्ट्रीय स्तर पर आगे लाने का दृढ़ संकल्प कर बैठा है और उसमें अग्रसर है इस आपके वरद हस्त और आप की शुभकामनाओं की आवश्यकता है सफलता के लिए ।

जहां पुरोहित जी का कार्य स्तुत्य है वहां हमें एक खेद अत्यन्त अखर रहा है कि प्रकाशन में शब्दों का रंग रूप सफलता की कसीटी पर पूरा नहीं उतर पाया, प्रूफ देखने में भी कमी महसूस होती है - पाठक इन्हें क्षमा करें - कुल्लू में यह पहिला प्रयत्न जो हुआ ।

चालीस वर्ष पूर्व की वह व्यथा - और अब थोड़ा संतोष -यही इस पुस्तिका के प्रकाशन की कहानी है ।

विनीत : लाल चन्द प्रार्थी

नोट : मेरे इस प्रस्तावना को हिन्दी भाषा में लिखने का कारण है । कुल्लूई में असल प्रस्तावना तो श्री 'वेबस' ने स्वयं लिख दी हैं जो कुल्लूई भाषा बोली को भली प्रकार जानने में समर्थ हैं और उस से अधिक लिखना आवश्यक भी नहीं । मेरा यह साहस है उन पाठकों के प्रति जो कुल्लू में जन्मे ना भी सही तो जो अपने आप को कुल्लू का मानते है, जिन्हें कुल्लू से प्यार है जो कुल्लू के हैं और बने रहना चाहते हैं परन्तु अभी इस बोली भाषा से थोड़े अनभिज्ञ हैं । उन्हें इस प्रकाशन का महत्व, इस के रास्ते की कठिनाईयां और हमारे भविष्य के कार्यक्रम का पता लगना चाहिए ताकि वे भी इस वांछित कार्य में हमारा हाथ बटाने के लिए साहस और उत्सुकता के लिए साहस और उत्सुकता से आगे आए ।

प्राची

दूई बोल तीतर—चाकर

ऐ नाँ सा एई पोथूरा, जुण तुसरें होथा न सा, कीबे जे एता न थोड़े जीहै गीता न टप्पे सी आपू गौंठिए भोरेंदें, आखरें कुल्लु तसीले री बोली न कथा पड़ाऊणी, परख्यान लामणा, बाम्हणू, भौंऊंरु सौंघे नाटी री भीठी भाखा ता इधी भावना आली गीता ता छूदी थी, पर एसा बोली न लिखणे छापणे रा जतन नी हुआ, एसी गली म्हारी बोली रे बोल लिखणे, खुंघणे, बाचणे ता फियाड़ने रा लोका नै वश नी आयी, एतेरा कारण ऐबी थी जे ओखले लोक बुहारान पेहले टांकरी है चोला थी, सौ बड़ी धाउड़ी लखाई सा, फीरी उर्दू आई, तेसान बी तीना सीभी बोल ढोकणे ता चुएडने री समरथ नई थी आथी हिन्दी रे देव नागरी आखर ता सी सीभी गला लिखणे नै ठीक पर तेते री बी खरी जाणकारी लोड़ी तने बी भियासा बाकी चू घोदें वाचीद नी आथी एको पाली बाचदेआ मूंडा न दाह चैकिया सा पर बीऊ जीऊ आगे पौढ़दें जाणा तेतरा है बोहू फियाड़िया बी सा ता मजा बी एजा सा ।

सीभी न पेहले ईसाई धर्मा आले आपणा प्रचार पोथू कुल्लु री बोली ता हिन्दी आखरा न छबाऊ थी, सौ आसो बड लोभा चाउ सौंघे पोहू थी । १९१७ री बीरशा न सौहरें रे मिडल स्कूला आले ता १९४१—४२ जगसुखा आले आपणी बोली न नाटक केरे थी, ते बी लोका नै वडें गोमी थी । अंदे है गीता टप्पे रा एक पोथू गश ल आएं रे ठाकर नीमत रामे आपू गौंठिए आपू छपाउ थी सौ बी देश सुधार ता समाज सुधारा पांछे बड़ा शोभला थी पर किचकी तंडा है गोभुआ ।

मैं बा पता नी सन् १९१२ रे बोटें रे मोकें किछ टप्पे गौंठिए छप ऐ थी तिनरा बड़ा शोभला परभाओ हुआ । तीना वाचोए राजा रघुवीर सिधे ता होरी खरें खरें लोकें मूंनो नाम बी धोने थी । तदी न पोर पं० लाल चन्द प्रार्थी होरें मास्टर नेसूराम होरें ता मैं बी लीखे ता केरू छूटा पर आगे पंजाब सरकारें सौ लेखे नी पाऊ हां आपणे तीउरें कई नाटक कथा ता गीत टप्पे लिखें केरू नाटक ता ग्राहुंजी कल्है नी सौहरा बजारा स्कूला ता कला केन्द्रा न सरीखे है । ते सारे देश दुहारा —समाज सधारा ता सरकारो परचारें री लैयें लिखे थी ।

कुलू री बोली रा नमूना मैं कुलू सौहरें रे भूमिऐ लोकें री है बोली पांछे डाहू कीने जे व्यास, शार्वती, गड़सा, सरवरी बजौरा घाटी सौहरा न है सीडिया सी ईना घाटी जे दूणने रे आंगी-आंगी लहजे सी तीना सीभी रा मौंफ सौहर है सा । सौहरें री बोली सा ता गडमड जरूर पर मैं खालस है काश्म डाहणे रा जतन केरुदा सा ।

आसरी बोली एक ता सा बी होखे जेहै जाकं री, सो बी सा केल्ही जेह्नी, मंडी न
 म्याऊं बलास पुरा- कांगड़ फेटे री लूड़ी न ऐ नी जुड़दी, एसो गले एसका नाता साता भेल
 पछियाणा होरी बोली सौंध नी हुऐ, रटांगा पोरें ता भला भोटी है बोली पौई, एसो गले
 सिम गुणा होदेंआ बीएसरी कदर कीमत नी पौई ।

जबे आसो हिमाचल प्रदेशा न मिली होर म्हारें मिम्बर प्राथी होरा बणे तीन सारें
 हिमाचली रें डोगा इंसरा न गोभुऐ दे ओखली कला ता साहित्य र खजाने तोपी कोल्लिए
 प्रगट करेने री तौये एक भाषा बिभाग बणाऊ, भाग तेई महकमे री जिम्मेवारी बी तिना
 बी हैमिली, तेई भाषा बिभाग सारें हिमाचली री १३-१४ बोली रें जाणकारा ता लखारी
 बी शुआह ता बाल बीना, तीनों सीभीए आपणी २ बोली रें कथा-गीता पख्यान-स्वांग
 पहाउणी आदि पराणी चीजा तोपी गेशीऐ प्रगट करे सौंधी आपणी २ बोली न आपणे
 २ लाको रें रुआज रसमा मुजब होर बी बोहू किछ लिखू, ईना छापणे रीतौये बिभाग
 “हिम भारती” नाए री पत्रका सीभी पहाड़ी बोली छापणे बी ता म्हारें पहाड़ री कला
 संस्कृति-साहित्या बी हिन्दी न छापणे री तौये सोमसी नाए पत्रका चलाई, ते हाजी बी
 जारी सी सी, एसा है सौंधी ईना सारी कला रें सग्रह आगी २ छापीऐ बाहू सारी पोथी
 छापो डाही दी ।

कुलु री केल्ही बोली बे बढावा देणे री तौये “प्राथी होरें कुल्लू साहित्य कला संगम”
 काइम केरु, तेई रा दफतर सीहरा शाहान रमणीक होटतना कोछें सा । पर किछ अंदा
 बुझिया साजी म्हारें लोक फैशने रें ब्याने न उडिऐ चटक-मटका आली पत्रका उपन्यास
 कहाणी पौढीऐ है मन भलाणा चाहा सी । आपणे लाको ता बोली रा चम-त्कार दर्शाने
 न किछ लोजिया सी ।

ऐ लौजीणे आली गल किछ अंदा हई साजी आसरी कुलुई बोली है लागी सा बोगड़ी
 दी, एसरा रूप ता मान मूल लागी घटदा, लोका देशी गला न बी ओघा सुध उदू-पंजाबी
 ता अंग्रेजी रा ढाव पायं बोली रा नाश लागे केरदें नुहार लागे बगाड़द, ऐ कोई सोमली
 गल नी आधी हिन्दी रा मान कुण नी केरदा ? पर एसा कुलुई रा मान कुणी केरना ?

जबे आसो आपणी बोली श्रीरें भालू तबे पता लागी जे म्हारी बोली ता बड़ी साहू
 कार सा आसो तुलसी रामायणा ता संस्कृती री कई पोथी रें टुकरें रें चुएदे आपणी बोली न

केर ता बोल शब्दे री को तंगी नी बुभुई थोड़ नमूने एई पोथू न बी सी इना असल पोथी सँघी मलाले ता पता लागणा जे आसै कोई चीज छोड़ी की बगाड़ी नी आयी । तढा है आपणी बोली न सीभलीखी सका सी सीधा आपणी बोली री रांभड़ी जानकारी ता हिन्दी आखरे री शोभली पछियाण लोड़ी तबै आसरें कूलू री केतर केही गला लिखणे बी छूठे लखारी निकली सका सी ।

एई पोथू रें गीता टप्प किछता नाटी रें ताल भाखा न गाणे रें ता किछ सी शास्त्री छंद, ऐ होआ सी बाभी गाऐ शणाणे री कविता ए गौंठणे ता होआ सी करडें जरुर पर जगे ईना बाचणे रा ठंग सई आऊ ता मजा बी बड़ा एजा सी कीबे जे ए कवित छंद बिलकुल शास्त्रा मताबक सी बणाऐ दे जेतर आखर एकी पाली न होआ सी तेतरें है पीछे तीये सीभी पाली न होआ सी ।

शास्त्री छंदा न मैं बोहू जेही गीता एसो गले लीखी जे उई न सी अकली बुढी री गला ता जाने री आसरें देशान गाण गा सी शौकी री नाटी नोचणे री तीये, तेता ने लोड़ी होआ सी चटपटी ता चुड़ चुड़दी गीता, दूजा हाऊं गायै शणाई नी सकदा तबै मैं एई पोथू रा नां “ तीतर-चाकर ” डाहू ताँढी तर्ज सा इना छंदे री । लोमी-३ पाली आले छंद एई कारणे पाऐ जे तीना न बोहू मतलब औपड़ा सा ।

ईना छापणे बै किछ हिमाचल सरकारें (भाषा संस्कृत विभाग) ता कूलू री साहित्या कला संगमे मू' बै शुआह ता मजत भौने, एसो गले मैं मूल बी थोड़ा डाहू । दूजा मैं ऐ वपार गजारें ने नी छापी, हाँऊं चाहा सा बोहू लोक पौढ़ा न ता आपणी बोली न आपणी ता होरतै री गला बी लिखीऐ प्रगटी केरा न । ता आपणे तीतरा-चाकरा बै भूरा न । ऐ भेट मेरी कूलू रें लोका ने सा ।

तूसरा आपणा माणू

चन्द्र शेखर वेबश, ढालपुर, कूलू (हि० प्रदेश)

-१- कुण कौखे -१-

गिणती	गीता रा नां	पोतरा	गिणती	गीता रा नां	पोतरा
1	रगनाजी री प्रार्थना (भज	1		भरियाली री बधाई	
2	राम गीतावली रा एक गीत	2	20	बजोगणी री चौठी लाड़े बें	41
3	कृष्ण जी री स्तुति	3	21	निहारखी रातीऐ	43
4	कृष्ण जी रा जनम ध्याड़ा	3	22	बजोगी री दुआसी	44
5	राम गीतावली रा गीत-२	4	23	चतर मासी री राती	45
6	भारत वर्षे री सराहुती	5	24	नुआरें ताल	46
7	नुआरा हिमाचल	6	25	बेउरा	48
8	गांधी	7	26	मनाल करड़ी	50
9	गांधी जी रें रयारा वरत	9	27	देश पियार	52
10	गीता रें स्थित प्रज्ञमागूह	10	28	आसी जागें	52
11	जपु जी साहब रें किछ शब्द	12	29	देश बणाणा	53
	राजे रघुवीर सिधैरा मोरन	14	30	आसी हिन्दुसतानी	54
12	तुलसी रमायणे रा एक दुकडू	14	31	जीने रा हंबला	55
13	तुलसी रमायणे रा राम		32	पंचायती राज	56
	जन्मे रा दूजा कारण	26	33	बेटड़ी पंचा	57
14	जवाहर जोत	32	34	छुं घ छेड़	58
15	जुगनू जीजू	32	35	ढौत	60
16	फौजी बीर	33	36	बणाहड़ी रा सप्ताह	60
	माणू री जात	35	37	मशीनी खाद	62
17	औउ री सौउखी	36	38	बीणेरी फराध	63
18	मेरो ढौकणू डालीऐ	38	39	खबर दार	63
19	सौत टप्पें		40	नशा	64
	कवि री भाभ-२० आपणी कथ-२१		41	परुआरें रा स्हाब	64
	जोमण मोरन-२२ सुख दुःख-२३		42	घोरु लड़ाई	67
	लोभी री आद-२४ दाह-२५		43	खापरी शोहरी	68
	मनी री वेदण-२६ तेहरवां महिना		44	बचणे री सलाह	68
	दोलतु री चौठी ठाकरी वो लिखू थी,				

कुन्त के महाराज श्री रघुनाथ जी की

प्रार्थना ?

जय परमेश्वर सिरी रगनाजी,

सारी विदरा लोड़ी राजी । जय परमे०

तेरा उच्छ्व विजय दशमी ।

जुग जुग डाही ऐसा रसमी ॥

सदा जिउं जिउं फेरी ऐसा ताजी । । जय०

जै जै ठारा करडू देऊ ।

रूढ़ रोग दुख लोड़ी नेऊ ॥

मुलखै लोड़ी जीती बाजी । । जय परमे०

तू सा म्हारा मालक ठाकर ।

आसै तेरै तीतर चाकर ॥

बेवश कोलै दूहै सराजी । । जय परमे०

धन महाराजा तेरी भांकी ।

कमल संघासन शोभा बांकी ॥

सीता याजी हनुमत गाजी ।

जय परमेश्वर सिरी रगनाजी ॥

श्री स्वामी तुलसी दास रचित राम गीतावली की अन्तिम कविता कुलुई अनुवाद

कविन्त छंद ३१ वर्ण-२

रघुनाथ तुसारै चलितर सी कंदै बांकै गांदै सदा रौहंदै अजुधयारै बासी सी,
 खुद परमेसरै ऐ माण्हू रा तुआर धारु बडै मना आलै तूसै ब्रह्म अविनासी सी ।
 जग थी बचाऐ तूसै ताड़का सुबाहु मारे खुशी हुऐ ऋषि जुण तपोवन बासी सा,
 शैल थी जै हुईरी शरापै लायै बाह्यणी सौ तारी धीनीभाली जबै तेसरी दुआसी सी ॥ १

मीभी राजै लोकै रा घमंड तूसै भौनी शेटू शिवजी रा बड़ा भारी धनष मरोड़िऐ,
 आए तवै घौरा तूसै जनकै री जाई सेंधै चांडू पर्सरामे री ता चांडा आए चोड़िऐ ।
 बापू जो री गल मनी ऋषियां रा भेष केरु आए चित्रकूट तूसै राज काज छोड़िऐ,
 डाहरी एक हौखी राजै इंदरै री बेटै री ता भौख काटी ऋषि री विरधा मारी लड़िऐ ॥ २

पंचवटी रामजी करुण सूपनखा फेरी मारै खर, दूबण, मरीच, गिधा तारी ऐ,
 मारिऐ कबंध सुगरीया सेंधै मेल केरु बीन्ही गेटू ताल सेंधै बाली गेटू मारीऐ ।
 बीन्ही ऐ समुद्र भालू बांदरै री मजतीऐ, लक्षमणा सुधजम आपणा खलारिऐ,
 भारी खानदानी भाई बेटेआं समेत मारु रावण ता देवतै रै दुख शेटै टारीऐ ॥ ३

बड़ा भला माण्हू तेई दुझिऐ बभीषणा बै लंका पुरी मौमै राजतिलक चढ़ाइऐ,
 सीता होर लछमण आणे आपू सेंधै होर जेतरै बी संधी थी ते सेंधै अणे पाइऐ ।
 बेटड़ी मरध दूरै भालदै अजुधयारै सैहरा कौछै रामैरा बमान पूजू आइऐ,
 महादेव ब्रह्मा धुकदेव होर नारद ते केरदै सतुति नई रौजदै सराहिऐ ॥ ४

सारै चौदा भुवनै रै जीउ ता परीउ आए नोकर ता टवरीऐ कुलराज धानीरै,
 बड़ा है अनंद हुआ मिले भाई भरत जी दुखडै बजोगै रै बसरै मन जानीरै ।
 वेद ता पुराण वाचै भौं ध्याडै राम जी रा केरु राजतिलक लप्राज खानदानी रै,
 अंदा बांका बागन फियाड़ दास तुलसिऐ भगती रा दान मौजू रामचंद्र दानी रै ॥ ५

कृष्ण जी री स्तुति

जे श्री कृष्ण जे भगवाना, सीभी देऊ रै देउआ ।
 एई जनमा धाचणु आलैआ, तेई लोकै रै सेउआ ॥ १
 धन धन भगवान नरायणा, देऊ देऊ शत्रु देऊ ।
 भलै बचाणे बै पापी मकाणे बै, आपु जन्म लेऊ ॥
 धन सालै रा भादरु महीना, धन शोभली ऋतु बसांती ।
 धन औज का औठवीं ध्याड़ा, निहारी औधड़ी राती ॥ ३
 राजै कसै री कैंडी घालदै आमा बापू रे पेटा ।
 सोला कला सैधै जनम लैइऐ, बणु आठुआ बैटा ॥ ४
 तेरै चलितर सारै संसारा न, सीभी भांतीऐ न्यारै ।
 पापी मारीए धरमी लोका तै होथ होथुऐ तारै ॥ ५
 जबै आसरी धौरती पांधे, पाप भोरुआ बोहू ।
 भांति भांति रै जनम लैइऐ, पाप दुवड़ा शोहू ॥ ६
 सीभी धरम ग्रंथा नटारिऐ, कौड़ी होछणी गीता ।
 कलिजुगै रै लोका तारणे बै, ज्ञान कठेरिऐ दीता ॥ ७
 आसा देवशा बै अकल देई, भलै लोकै री सेवा ।
 मुना धरमा न शरधा लोड़ी ता तेरै चरणा न रेवा ॥ ८

कृष्ण जी रा जनम ध्याड़ा

सारी विदरा जौणनू आला, औज तेरा जनम ध्याड़ा ।
 औज सरगै रा द्वार ध्याड़ा, कृष्ण जी रा जनम ध्याड़ा ॥ १
 कैद खाने जनम लैऊ, गोकला जाइऐ गमेऊ ।
 तौरु जबना जी रा ताड़ा, कृष्ण जी रा जनम ध्याड़ा ॥ २

चौऊ कुंठै रा जै मालक सौ दसोधा रै फाड़ै बालक ।
 बणी गैऊ बैकुंठ फाड़ा, कृष्ण जी रा जनम ध्याड़ा ॥ ३
 पूर्ण ब्रह्मा जै शोहरू आला, तेई छालदा कंस काला ।
 आपणे आपै रा बगाड़ा, कृष्ण जी रा जनम ध्याड़ा ॥ ४
 कौम याणू रै नुआरै, बोहू सारै राकस मारै ।
 भालना शोहरू गुआला, कृष्ण जी रा जनम ध्याड़ा ॥ ५
 पापियां री गंध मकाई, आगो बै गीता बणाई ।
 धर्म ग्रंथां रा चुआड़ा, कृष्ण जी रा जनम ध्याड़ा ॥ ६
 तू करार आपणा नभेई, 'बेवशा' बै हौथ देई ।
 बौगत सा किछ आउ माड़ा, कृष्ण जी रा जनम ध्याड़ा ॥ ७
 जन्म अष्टमी पर्भ प्यारा, कुल्लू चमकू औज सारा ।
 ढाल पुर ता बहर खाड़ा, कृष्ण जी रा जनम ध्याड़ा ॥ ८
 आसा लोका बै अकल लाई, दूर केरी हाही खाही ।
 पौउ नी लोड़ी पुआड़ा, कृष्ण जी रा जनम ध्याड़ा ॥ ९

राम गीतावली के एक पद्य का कुलुई अनुवाद

५

माई कशलया बेटे निहालदी, मनदी शगन केरदी भाठा ।
 बोल डै काउडै सच जै कबै, एजणा बचडै तू जै बाठा । १
 दूधा न मूछिए तौमे खियानू, भौतैरै गाजीआ भौरिए हूने ।
 चूंजी बै तेरी दियानू डै मौढ़ने, औज सन्यारा न कुंदन सूने ॥
 सीता समेत जै भौरिए हौखी, भालिए लानू डै कालजै शूने ।
 लखण रामा, ऐ पौढ़तू पाठा । मनदी शगन केरदी भाठा ॥ २
 बोणा न एणे रै नेड़ धियाडै, जाणीऐ हुई री माई वियाकल ।
 पंडत जोतषी शाधिऐ तिनरी, बौदिए जौवा ता पुछदी गल ।
 बोला जी शास्तर रौहू की हाँठ । मनदी शगन केरदी भान ॥ ३

तेई है बौगतै कौसकी लोकै, भरता आगै न खबर आणी
 रामे रै एणे री तुलसी शूणी, मोरदी म्हाछी बै मिलू जै पाणी
 एतै री तैयें थी काउड़ा बाठा, मनदी शगन केरदी भाठा ४

भारत वर्षे री स्तुति

६

धन धन म्हारै हिन्दु सताना
 सारी दुनिया न चमकी शाना
 मूंडा पांघे तेरै हीऊंरी पघड़ी, काया नाजैरी हौरी
 नाल नौई तेरी लोहू री सोरा, चूल फूलिये भौरी
 सती बेटड़ी जोधै जुआना ॥ १ ॥ धन धन म्हारै०
 बाल बचै तेरै शौठ करोड़ा, धौर बौसदा घौणा ।
 गोरू भेड़ा हाथी घोड़े पखेरू, फौला बूटी रैं लौणा ॥
 खान्ती भोरू बे अंता खजाना ॥ २ ॥ धन धन म्हारै०
 धन धन तेरै लीडर लोका, तिन रंगा नशाणा ।
 धन तेरी चौऊ सिधै मूरत, जन गण मन गाणा ॥
 सचा सौदा ता बडी दकाना ॥ ३ ॥ धन धन म्हारै०
 एक जेहू तेरै बेटड़ी मरध, सिभ धरम जाती ।
 सारै मुलख सी मितर तेरै, पंच शीलै री शांती ॥
 केरै 'बे वशै' सिभ समाना ॥ ४ ॥ धन धन म्हारै०
 जाण कार सी धौरै रैं बडकै, सारै टबरी माणू ।
 मोरै चोरै बै फेटै डकाइए, राज आपणा आणू ॥
 सीभी गौमदा रजू बधाना ॥ ५ ॥ धन धन म्हारै०

नुश्वारा हिमाचल

मिश्रित कुलुई ७

देश हिमाचल न्यारा हो, जीहां भियांसरू तारा हो ।
उच्चे पर्वत हिउआं ठकीरे, सड़का ता जीहां सर्प चली रे ।

चढ़दे टूक ता कारां हो, देश हिमाचल न्यारा हो ॥ १

चीलां दियारां बभां रे जंगल, बकरी भेडां गोरू रे दंगल ।
उचियां निठियां धारां हो, देश हिमाचल न्यारा हो ॥ २

पथराली जीमी अंबर पाणी, भाग भरोसे ही जान खपाणी ।
लगदां पाणी कियारां हो, देश हिमाचल न्यारा हो ॥ ३

बाग फलां रे चार किनारे, गीत रणकदे घासणी धारे ।
जातरां नी भरमारां हो, देश हिमाचल न्यारा हो ॥ ४

देवियां देवले ढोल नगारे, पूजा ता भगती पुछ पधाड़े ।
नाटियां नोखा नजारा हो, देश हिमाचल न्यारा हो ॥ ५

हुघड़े नालू खड़ा सुकियां, कई बर्साती वधियां ।
हीऊं पाणी री फुआरा हो, देश हिमाचल न्यारा हो ॥ ६

लोक भले पर वीर लड़ाके, डाकू मंगते ना चोर उचक्के ।
भोलियां बांकी नुहारां हो, देश हिमाचल न्यारा हो ॥ ७

दुर्गा भवानी सँसारा री अम्मी, म्हाचलारे घरा आई जम्मी ।
वैरियां रा निपटारा हो, देश हिमाचल न्यारा हो ॥ ८

बांका हिमाचल नोखा नजारा, दिखणा बसणा सुन्दर प्यारा ।
संगतरेयां रीयां फाड़ां हो, देश हिमाचल न्यारा हो ॥ ९

गान्धी

जौमदै आऐ आसरै देशा बडे न बडे माणू, ।
देउ तुग्रार ता ऋषि महातमे सर्ग प्याड़ा आणू ॥१॥

की सँसार ता कढा प्रमेसर भेत थी पछियाणू, ।
कूणा सी आसै ता कीं जीबै जौ मै कौखै बै जाणा ऐ जाणू ॥२॥

तंडा है गांधी महात्मा जौमू थी, हिन्दुसताने रै भागै ।
बौरशा शौउ न पहलै, जबै भाग गरीबै रै जागै ॥३॥

पछमी भारता लाका सौराष्ट्र, पोर बंदरै री गादी ।
राज कोटै रा सिरी बजीर थी, कर्म चन्द जी गांधी ॥४॥

तेई रै घौरा न जन्म लेऊ, मोहन दास रै नाएँ ।
धनी ता धरमी घौर थी चौखा, मनीरा नगरे गएँ ॥५॥

पौढ़िए घौरा न नौठा बलाइती, बणू वकील थी बडा ।
खटणा छौडिये चैथुए लोकै री, मजती हुआ खडा ॥६॥

एकी लोकै सौ दखणी फ़ीकै, वकील आपणा केरू ।
देश तोखला जिकिए, ग़ेजेरा जल्म गांधीए हेरू ॥७॥

देश बलाइती रोहै आजाद, पौढ़िए पहले जागै ।
देश होछणे पेट गजारै बै, पिछड़ै चैथणे लागै ॥८॥

आसरा भारत लंका ब्रह्मा, ता पूरबी एशिया सारा ।
अरब जीकू फरीकै मरीकै बै, चैथिए पाळु निहारा ॥९॥

जीकुए देश रै भूमिऐ बौसणु, कौढै गदोड़िए फेटै ।
घौरा गराहुँजी जगा जमीना, न कबजा केरिए बेठै ॥१०॥

तूबकै तोफ़ ता बंब रै गोलै, भूमिऐ बौसणु भूने ।
ते ता दियाउणे तीर कमाणिए, मारिए केरतै शूने ॥११॥

कुली बणाईए हिन्दुस्तानी, देशा फकरी बं भेजे ।
तौखै पजेरिऐ केरी कुदशा, दगै बाजें अंगरेजे ॥ १२

भारती, अरबी भूमिऐ तौखलै, होरा बी जूणा थी कालै ।
गोरै फरंगिऐ लूटी घसीटिऐ, कबजा केरिऐ छालै ॥ १३

कालै लोकैरी भाली कदशा ता सत्याग्रह पराऊ ।
बुरा नी बोलणा हौथ नी चंकणा, अड़िऐ मौंगणा न्याऊ ॥ १४

मनी नी बधकी, चोड़े, कनूना, मुलख विपता खौही ।
गोरै पतारुऐ जुलम केरिऐ आखर मनणी पौई ॥ १५

शादी वियाह ता गुठै लुआणे रा, मुंडी रै पौंड चाई ।
टैक्स लैआ थी हाकम गोरै, गला ऐ चोड़ने द्याई ॥ १६

हिन्दुस्तान बी तंढा है जीकीऐ, डाहू थी कपटी गोरै ।
एई छड़ाणे री फिकर केरिऐ, आउ फरीकै न ओरै ॥ १७

गांधी ऐ तौखै न भारता एजीऐ, कांद्रेस चमकाई ।
लीडरा ढाबिऐ देशा छड़ाणे री एक विध समझाई ॥ १८

हाल थी बुरा हिन्दुस्ताने रा, आंगी थी केरी रै लोका ।
बडै लोका थी फरंगी रै वशा न होछै लोका बै जोका ॥ १९

सीभ वर्ण धर्म जाती थी, एक दूजै बै लागू ।
फ्याड़दा कंढै चलाकी गरेजै री, देश नी जबै थीजागू ॥ २०

आसा बै गोरै जे बार्हका बोबू ता गल बुझुई माड़ी ।
औधा देश अपू बाइका केरिऐ ऐ गल नी फ्याड़ी ॥ २१

एक बाब परमेश्वर बेटे सी सिभ धरम जाती ।
हरिजन बीसी तेई रै बेटै, साऐ गांधीए छाती ॥ २२

तबै ठोकुऐ जादी री जगा न, शस्त्र जोर नी गौठी ।
सरकारा अ.गै तुबका तोफा, जात गोरी नरौठी ॥ २३

केरु औखै बी सत्याग्रह गरेजै री गल नी मनी ।
कैद डण्डे ता फांसी ता गोली खायै बी गलै रै धनी ॥ २४

बुरी दशा थी गेजे रै राजा न आसै भालीरा तदी ।

देश भगतै विपती घालीआ, तबे पाई आजादी ॥ २५

राज पाट तेई नई थी लोड़ी, राम राजा थी परांदा ।

घोर घोर में शांति पियारै रै, पाठ रौह पढांदा ॥ २६

एकी ध्याइ परमेश्वर ध्यां देया, गांधी महात्मा बापू ।

गोली मारी एकी आपणे देशीऐ, विष खाउ जंढा आपू ॥ २७

गांधी नियाऊ औउखै बौगतै, कौम धाउडै छटैरै ।

राम राज थी देशा न आणना, तेई पिछनी घेरै ॥ २८

दुनिया देश रा मारगा केरु डै, ऋषि माहातमा छालू

सती तपी ता माणू नकौला थी, प्याशा सौ फूकरै शालू ॥ २९

सारा संसार सा गांधी रा ऋषि, मता थी तेई रा स्याणा ।

मारना काटना कोई नी कौसी, जुगती जीणा जियाणा ॥ ३०

धाउडै कौमा बै छोड़िए जुणी बै, नौठा माणू 'बेबशा' ।

पूरै केरने सीभीऐ, छोड़णे छूँच छेड ता नशा ॥ ३१

गान्धी जी रै ग्यारा वरत

६

अहिंसा, सत्य, अस्तेय, ब्रह्मचर्य, असंग्रहः ।

शरीर श्रम, अस्वाद, सर्वत्र भय वर्जनं, ॥

सर्व धर्म समानत्व, स्वदेशी, स्पर्श भावना ।

विनम्र व्रत निष्ठा से एकादश संन्य हैं ॥

१ अहिंसा अहिंसा-कोई नी जीऊ दखेरने, काटगे ढोसणे खाणे ।

बुरा नी कौसी रा सोठणा केरणा, जाणिए चाहो नजाणे ॥ १

२ सत्य सच, प्रमेश्वर सचा न बडा नी तीरथ वरत दान ।

जुणिए सचै रा पकड़ू पाला, तेय पराऊ भगवान ॥ २

- ३ अस्तेय चोरी नी बोलणी एतरी केलही, जे चीजा लोकै री चोरी ।
गजारै न बघकी चीज री तुष्णा, मना न आई लोड़ी ॥३
- ४ ब्रह्मचर्य ब्रह्म चरज सचा परमेशरा, धर्मा पराणे री कला ।
बेटड़ी मरवे खोटा नी केरना, मन बुहारै ना गला ॥४
- ५ असंग्रह जोड़ना बाटणा गरजी मुजब, माल नी ढाबणा बोह ।
लालचा लोभा न भले ता बुरे रा, ध्यान नी लोड़ी थी खोऊ ॥५
- ६ शरीर श्रम सीभी बै लोड़ी थी पौरसु चूड़दै, केरिऐ पौजणू खेऊ ।
ऐका नी लोड़ी थी छुकीदै पीटदै, एका नी डेहरै देऊ ॥६
- ७ अस्वाद स्वादै रा बादै रा अंत बी कोई बी, चटका स्वादै रा बुरा ।
स्वाद रै मजै बै छोड़णै बांभी, कदी नी पौड़दा पूरा ॥७
- ८ सर्वत्र भय वर्जन, डौर सा शतरू माण्हूं रै मनै रा, भसकैलाऽसा भूकू ।
लोका सकारै री डौर नी मन जै, सच री धीरै बै भूकू ॥८
- ९ सर्व धर्म समानता, धरम सिभ परमेशरा आगै, पुजणे आली सी बौता ।
आपणी बौतीऐ हौइदे रौहणा, होरा बै टोकदै मता ॥९
- १० स्वदेशी घौरा गराएं रा लाकै रा देशै रा, सट समान लगाणा ।
कौतणा, बुणना, कुटणा, पीशणा, देशै रा देशा न खाणा ॥१०
- ११ स्पर्श भावना, उथडै निशटै भीतरू बाहकै, छुंघु न छुंघणु सारै ।
बाव प्रमेशर एक सा सीभी रा, अपू न सिभ भरारै ॥११

गीता री 'स्थित प्रज्ञ' माण्हू री पद्धियाण

१०

अर्जण जी ऐ पूछ

स्थित प्रज्ञ समाधी न बेठा दा कुण, बोलणा कृष्ण जी ।
कंढा हौडदा बेशवा उठदा, कंढी तहें सौ दूसदा की ? ॥

भगवाने दसू

लोभ चाउ ता मनै री भाभा, बुण अरजणा ! छोडा सर जदी ।
आपणे आपू न मस्त जबै जै, स्थित प्रज्ञ बोलीणा नदी ॥२

सुखा न जुण नी फुलदा नां ता, हादीदा पौड़िऐ जूनी ।
भीक भुरी ता डौर नी जौस बै, धीर बुधि सौ मुनि ॥३

गौमदी गला बें खुशी नी जुण ता, माड़ी नी गला बें रोंदा ।
भलें ता बुरें न जुण नी लेसीदा, धीर बुधिया सौ होंदा ॥४

मुंडी ता टूंडी बें कछुआ जंदे जे, आपू हेठे सा भाड़ा ।
भोगा न इंदरी भाड़ला तंदे जे, स्थित प्रज्ञ सौ फियाड़ा ॥५

छूटी जाऽसी भोगणे बांभी ऐ, भोग बी काया रें सारें ।
लाग बी तीनरी जाऽसा तबे, ऐसा आत्मा रें वुहारें ॥६

चबे बालहुई इंदरी जतन जाण कारी, बी चाहे केरा ।
जोरा जबरिऐ माण्हू रें मना लै, आपू धीरें सी घेरा ॥७

जोर केरिऐ ईना बें गोटे ता, मेरी सरना न पौऐ ।
ईना इंदरी बें जीतणू आला, स्थित प्रज्ञ होऐ ॥८

विषे भोगा बें सोठदे सोठदे, मन तीसै सा टीका ।
तबे पे जागा सी मनै री भाभा, भाभा चूटीऐ भीका ॥९

भीकै जौमा सी भरम मना न, माण्हू बेउरा तबे ।
बुध मारिया सा बेउरै फिरिऐ, सौ मूर्ख ता डूबे ॥१०

ईना इंदरी भोगदी घेरै, बुधी ओपरी डाहै ।
मन मौउजीरी विरती लाइऐ, प्रसाद आत्मा पाऐ ॥११

हुआ प्रसाद जबै अर्जणा, तबे दुख निभदै जाणे ।
खुशी माण्हू री अकल रौहा सा, सदाहें एकी ठकाणे ॥१२

नीमा धरमा बांभी न अकल, भावना तबे नी भली ।
भावना घटी नी मना नी शांति, शांति शांभी नी तसल्ली ॥१३

ईना इंदरी भोगा न मनै, जुण इंदरी छेड़ी ।
सौ तीणा सा अकली तदे, जंदे जे बागर पाणी न बेड़ी ॥१४

तूई री तैयें पै महाबाहू जी, जुण मनो काबू न आणे ।
आप आपणे भोगा न इंदरी, तेई री बुध ठकाणे ॥१५

सीभी जीवै री रात सा जबै, जागदे तबै सी जोगी ।
 तीना मुनि री रात सा जबै जै, जागदैं हौ आसी भोगी ॥१६॥
 चौऊ धीरै न भौरीदा नौइऐ, ताइम सागर भाला ।
 सुखी सौ भोग डूबदैं भूणी न, सुखी नी भोगणू आला ॥१७॥
 सीभी भाभा बै छौगिए जुण जै, माण्हू न गरजा रौहैं ।
 माया ममता हऊंता छौडिए, शांति प्राप्ता सा सौहैं ॥१८॥
 'ब्राह्मी स्थिति' जबै मिलू परमेश्वर, मोह नी तेता रौह ।
 ऐसा न पेशिए मौरदी धेरै, ब्रह्म रै मजै न पौऊ ॥१९॥

गुरु नानक जी री वाणी 'जपु जी साहब' रै शब्दै रा कुलुई चुआडा

११

असल सत सा सीभी न बडा नां, सी तेई रा एक उँकार ।
 प्रगटा आपू ता सौउतैं बौसदा, तेयै बणाउ ऐ सारा सँसार ॥
 तेई री काया ना बौगत बेला, तेई नी कौसी री डौर वकार ।
 किरप तेई री वधकी शदर' सौहै सा सीभी न बडी सकरि ॥१॥
 सोठीऐ सत नी मिलदा कौमी बौ, सौठदैं बेशा जै लखा है वारी ।
 गुड़क बेधिए तबै बी तंडा है, लाईऐ बेशा जै केतरी ताडी ॥
 भुख पकारिए रौजीदा नई, ज बौन्हिए भौरिए बूजकै भारी ।
 सेंधै नी चौलदी बुध मियाणे री, ढाबुई बेठै जै लख हजारी ॥
 कंठै परांडदा सत परमेश्वर, चोडीदी भूठै री कैइ दी घाली ।
 नानक बोला सा मरजी तेई री, लिबुई चौलणी संघण म्हारी ॥२॥

हुकम तेई रा दूणीदा नई जै, हुकमै वणा सी घाट तुहारा ।
 हुकमा लयै पै बणा सी बड़े, ता हुकमे लुका सी जीउ सँसार ॥
 हुकमै होआ सी भलै ता माडै बी, औउखी सौउखी हुकमा सारा ।
 एका बौ हुकमै मिला सा गादी, हुकमे होरा सी फिरा नकारा ॥
 हुकमा भितरै विदरा सारी सा, हुकमा बाझी नी कोई ब्रुहारा ।
 तेई रा हुकम जबै फियाडदैं, कीई नी केरदा हाऊ हँकारा ॥३॥

केरला कुण सराहुती तेईरी दसीदा नई जै जाणे नशाण ।
 केरनी कौस सराहुती तेईरी, कठण जोसरं विदया ज्ञान ॥
 माण्डू बणादा ता केरदा छार बी, एकी रै होरा न भौरदा प्राण ।
 बूभी दा दूर सा मना न नेइ, जै केरै सराहुती कौसरें प्राण ॥
 लख करोड़ है दूणदै रौहात गल नी निभदी तेईरी जाण ।
 देण नी निभदा मोंगदै थकदै, केतरै जुगा न खांदे सी खाण ॥

धरम पंथ सी तेई रै हुकमै, नानक कोई नी बोथ ठकाणा ॥ ४

सच्चा सौ मालक बी नां बी सचा, सची सी तेईरी मुकती गला ।
 दंदा है रौहा सा मोंगदी दुनियां, दै दे बोलिऐ केरदै हला ॥
 कीजीरी तेई बँ दे आम डाली, तेई रै घौरा बँ भालदै भला ।
 भूरदा आसा बै अरज गुणिए, कौखै न केराम दूणन कला ॥
 तड़कै उठिए सोठणा मालक, अरजा केरनी ताड़ना पाला ।
 पिछलै करमै मिलीरी काया ता तेइरी दया न मुकती पाला ॥

नानक बोला सा बुझणी तेइरी चौउ चकुंठा न सचै री कला ॥ ५

सोठिए मिलू बणायै नी बणू आपसे आप सा सौ न थोहा ।
 पूजू सौ जूणिए तीनै पराऊ, नानक मालका पूजदै रौहा ॥
 दूणदै गुणदै सोठदै तेइबै काटीऐ दुखा सा सुख परौआ ।
 नाद ता वेद सी गुरु रै मुखान, गुरु रै मुखान सिभ सी होआ ॥
 गुरु परमेसर पारबती गोरख ब्रह्मा बँ जाणदै रौहा ।
 तेई ता गुरु बँ हाऊं सा जाणा, दसनू कंठे जै दूणना पौआ ॥

मूँबै सा दसूदा गुरुऐ सीभीरा जीबै रा दाता सा सोठदै रौहा ॥ ६

तीरथा न्हाणे रा तबै सा मजा जै पुजदै तेई परमेसरा आगै ।
 तेई नी गौमै ता चीधिऐ कीजी नै काया नै पाणी न चोकदै लगै ॥
 जेतरी दुनियां भाली ता कोई बी करमा घटी नीपुजै न भागै ।
 चमकै अकल हीरै जुआ हरा साही जै गुरु रै मंतरै लागै ॥

गुरुऐ दसु जै सारै संसारै रा एक सा दाता नी विसरु भागै ॥ ७

राजे रघुवीर सिंधा शांगरी आलै रा मोरन

राजै साहबा शांगरी आलैआ, तेरी गीता की लाणी ।

रघुवीर सिंध राजै री कथा, होई चौली पराणी ॥१॥

मान सिंध री जीतुई ठाकरी, शांगरी नशाणी ।

मान शान डाहै काइम कुलूरै, खान दानी परणी ॥२॥

कंडी शोभली सूरत मूरत, बांकी नीत ता बाणी ।

सचा लीडर कौल ना कपट, सची गला जनाणी ॥३॥

बुध न्याऊ नसाफै री, वृकम बीता आणी तै आणी ।

सोठी शूणीऐ तेरै चलितरा, हँसी बगदा पाणी ॥४॥

नई छोडी रगनाजी री चाकरी, कुल रीत नभाणी ।

केरी दशमी औधी न, धाउडी नौठा एक वधाणी ॥५॥

कीब हुआ बे वौगत मोरना, नोली गल ऐ जाणी ।

बीज पौई जंडी एकी चमाकै न, फीरी दुनिया काणी ॥६॥

नीभू खौलहड़ खरच राजेआ, नीभू तौयड़ पाणी ।

अढ़ा गोभुआ एकी पटाकै, न नइ छोडी नशाणी ॥७॥

रोंदी विदरा हुई बेबरा ता हुई वेढे री राणी ।

दादी हिडमा रै फाड़ै न, नौशिऐ सूता पोचा वधाणी ॥८॥

गसाई तुलसी दास जी-राम चरित मानस

रा एक टुकड़ु अयोध्या कांड राज तिलकै री तियारी कुलुई बोली न

१२

छंद दंडक

फाड़ै पांघै जौसरै हिमाचनै री बेटी उमा, मूंडा पांघै देवतै री नौई माई गंगा सा ।

सौथै पांघै चंद्रमा ता गौला न सा विष होर, हीका पांघै जौसरै ता खडपा भजंगा सा ।

जुण महा देऊ सारी दुनिया रा मालक सा, सदा सौहै जुणिऐ भभूता लाई अंगा सा ।

सौहै शर्व शिव जुण सौउते बराजीरा सा, रक्षा केरै आसरी सौ शंकर नशंगा सा ॥१॥

लागी राजगादी फूल खुशिए नी जुण,
जबै हुआ बनवास तबै दुखै नई भाडुआ।
कमल रा फुल रघुनन्दने री मुख शोभा,
भला केरे केरै लोड़ी औउखा नवाडुआ।

नीलोफर फूला साही शाउँलै नरम अंग,
बांवी धीरै जौसरै बराजीरी सी सीता जी।
ढौकीरै सी होथा लायै तीर ता कमाण बाँकै,
मौथा टेकू तूसा आगै रघुकुल पिताजी ॥२॥

जदी नौरै राम जी वियाह केरी घौरा आऐ,
रोज नौवी मौजा ता वधावे लागै बाजदैं।
पुना परतापै रैं बादल सुख बरसादैं,
चौदा लोक परबत रूपा न बराजदैं।

ऋषि सिधी धन माल नौई साही उलड़िए,
ठावी दी अजुध्या रैं समुद्रा मौँभै भगदैं।
शुचै बड़मूलै हीरैं मोती साही बाँकै सिभ,
बेटड़ी मरघ जाती भांती रैं सी सजदैं ॥३॥

नगरै री शोभा किछ हूणने री गल नई,
बुझिया थी ब्रह्म आगै एतरा है जोर सा।
सीभी गलैं सुखिया सा जुधया री प्रजा,
सौ राम जी रैं चंद्र मुखा भालदी चकोर सा।

सुखी सिभ माई होर सँघणी सहेली जबै भाली,
लूड़ फौल दैंदी मन रैं मनोरथा।
राम जी रा रूप रीत नीत ता सभाउ भालै,
नौचा राजे दशरथ जी रा मन मोर सा ॥४॥

दोहा :- सभै मना न चाहँदैं, सुखदैं देउ महेश।
दैंदैं आपू रामा बै, गादी म्हारै नरेश ॥५॥

बोलू राजे शूणा ऋषि मुनी रै प्रधान होरो, हुआ अबै राम सीभी गलै जाणकार सा ।
 वजीर कर्मचारी सिभ अवधै रै वासी जुण, वरी सा कि मित्र चाहे कोई एक सार सा ।
 मूँहै साही हेरा सीभी लोका बै सा प्यारा राम, बौरै लायै तुसरै ऐ लैहरा तुआर सा ।
 मोह सिभ एई सैधै केरा सी तूसा है साही, बाह्यण सी जे नाम तीनरा परआर सा ॥ ९
 जीने गुरु चरणे रा माटा लाऊ मौथै सैधै, तीनै केरु काबू सारा सुख डाहा बुझिऐ ।
 आसा साही एतेरा तजरबा नी कौसी बै जे, मिलु संवस माटा चरणे रा पूजिऐ ।
 एक भाभ रौही अबै मेरे मना महाराज, तुसरी है दया सैधै ऐबी जाणी पुगीऐ ।
 हुऐ मुनिराजी भालू सचा प्यार राजे रा ता, बोलू केरा हुकम नी डोहणी गल गुझिऐ ॥ १०

दोहा :—

नां जश सभ किछ देणिया, तुसा रा सा माःराज ।

इच्छा न आगै फौल सा, तेरा नृप सरताज ॥ ११

हुये सीभी तैहं परसिन्न गुरु, जाणू जबै, केरी मीठी मीठी गला सैधै राजे अरजा ।
 केरा महाराज तुसै हुकम ता देई देदा, राम चंदरा बै जुबराजा आला दरजा ।
 होदा आसा आसतै ऐ उच्छव ता जलसाबी, हौखीरा सुआद लैई लैदी सारी परजा ।
 दया तुसरी ऐ शिवजी ऐ सिभ पूरी केरी, पूरीदी ऐ भाभ ता नभेरी देदा फरजा ॥ १२
 फीरी नी थी भौख काया रौहंदी की जांदी लाग, रौहंदा नी कौसी गलै पीछे पछताईणी ।
 खुशी हुऐ मुनि शूणी गल दशरथ जी री, मौउज वधाई खुशी मजै री लभाउणी ।
 शूण राजा जौसरै वरोधी पछताईया सी, जौसरै भजना बाभी जौलनी नी जाइणी ।
 सौहै परमेसर सा बेटा बगू तेरा औज, रामा बै पबितर परेम मन भाइणी ॥ १३

दोहा :—

राजा छेकै देर नी, केरिऐ कुल समान ।

रामै री गादी जबै, सौहै बेल प्रमाण ॥ १४

खुशी होइऐ राजा नौठा तबै बेढे भीतरै, मलाजम सुमंतर वजीर शदाइऐ ।
 केरी तीनै दुं बलिऐ जे जिया महाराज, राजे मूल गल दसी तीना बै शणाइऐ ।
 लागी मेरी गल सीभी पंचा बै जे शोभली ता, देआ राज टीका रामचंदरा बै लाइऐ ।
 शूणी गल राजे री वजीर होरा हुऐ खुशी, होरा फीरू बूटा जंढे ठीक पाणी पाइऐ ॥ १५

केरी तबै अरज वजीरें होय जोड़ देया, मीलै सरकारा बै करोड़ा साला जीउणा ।
भली सोठी महाराजें मुलखैरै भली आली, छेकं केरी देया नई बोहू बलगीउणा ।
बघी खुशी राजै री वजीरें री जें गल शूणी, जंड़ी लूड़ बधासा चढ़ायें बड़ै भीउणा ॥ १६

दोहा :- राजै बोलु वसिष्ठ मुनि, जे किछ हुकम शणाए ।

रामै री मादी तें ये, केरा कुल उपाए ॥ १७

बोले महाकृषिऐ ऐ खुशी होयै मीठीं गला, पाणी सीभी तीरथै रा ढाबा एक आणिए ।
ओखती बनासती जलाड़े पौचा-फूल-फौल, होर बोबहू सारी चीजा दसी तीनै गौणिए ॥
मृग छाला चौउरी अनेक भान्ति कपड़े री, रेशमी नुआलै कई रंगे रै सजाणिए ।
हीरै मोती रतन ता होरा चीजां सैकड़ो ते राज गदी आगै लोड़ी आणी पछियाणिए ॥ १८

जंढा-जंढा वेदा न वधान सा सौ दसू बोला, ताणी देया नगरा न रंगो रंगी चानणी ।
फौला सुध अंबैरै सपारी रै बी बूटै आणा, गड्डा शहरा फेर संधै गोलही-गोलही साजणी ।
चौक पूरा हीरै मोती मणियां रै बांकै-बांकै, साजणे बजार तीसैं बंदन माला बौन्हणी ।
केरा सीभी भांतिऐ बराह्मणे री सेवा हीर पूजा गणपति कुल देउ देवी मनणी ॥ १९

दोहा :- तोरण कलश धजा सजा, हाथी घोड़ै रीथ ।

मनिए मुनि रा हुकम सिभ, लागै होथो हीथ ॥ २०

जंढा कौसी माण्हू बै हुकम मुनि होरै केहू, तेयै शटाशट शेटू कौम सौ नभेरिए ।
जौस गलै राम जी रा होऐ कल्याण भला, राजै देऊ साधु ता बराह्मणा रजेरिए ।
शूणी जबै लोकै राज गदी री खबर तबै बुधियान घोर-घोर बाजै लागै बाजदें ।
लागै सीता राम जी री काया न शगन होदें, मिधै लागै फड़कदें भलियाई साजदें ॥ २१

खुशिए ता भूरदेया आपू मौंभै दूणुऐ ते, भरतै रं ऐजणे री बुझिया नशाणी सा ।
हुऐ बोहू रोज अबै लाग़ा बुरा तेई घटी, तेई मिलणे री ईना शगना शणाणी सा ।
नई कोई दुनिया न भरता न प्यारा आधी, तेहै लागै शगन ऐ शास्तरै री बाणी सा ।
राम जीबै भरतै री याद एंदी रात घ्याड़, कछुऐ रें मना जंढी डाने री कहाणी सा ॥ २२

दोहा :- रौणक बघी नरौलै री, शुणिए खबरा बांकी ।

सागर छाली उछलदी, भालिए चंदर भांकी ॥ २३

बेढ़े जायै जणिए शणाई गल पैहले है, कपड़ै ता गहणे रा नाम मारु तेइऐ ।
 खुशी होयै तने मनै फुली सिभबेटड़ी सजांदी लागी मंगलौ रं कौलशौबे लैइऐ ।
 राणीऐ सुमितराऐ / बोहू मणिरतने रै, बांकै - बांकै पूरै बोहू ऐपण बणाइऐ ।
 राम जी री आमै बड़ी खुशी होयै दान धीने, बोहू सारै ब्राह्मणा बै बेढ़े न शधाइऐ ॥ २४

पूजी देवी ग्रांरीता होर देउ नाग पूजै, बोलू फीरी देनू हांऊ होर भाग बलिरा ।
 जौस गलै होए कल्याणग श्री राम जी रा, देआ दया केरी वरदान गला भली रा ।
 गांदी ते वधावे लागी कोकला रै कंठा आली, मुख चंद्रमां रा ता नैन मृग छेली रा ॥ २५

दोहा :- तिलका आली गल शुणी, मर्ध बेटड़ी राजि ।
 भाग चमकदें जाणिए, खूब सजावट साजि ॥ २६

तबै छाऐ शाधणे वशिष्ठ मुनि राजै होरै, भेजै राम जी रै बेढ़े बुध समझाणे बै ।
 शूणू गुरु होरा आए ऐजिए परौली आगं, टेकू मौथा राम चंद्र वशिष्ठ जी स्याणे बै ।
 सौळा है समग्रीऐ पूजिए ता अर्घ दे यै, आणे बडे माना सेंधै हांधरै वशाणे बै ।

बौंदी जौ घा दूही दूहणै सीता सुध जौड़ै दूहै होथ तीने हुकम फरमाणे बै ॥ २७

बोलू आए मालक जै चाकरै रै ओबरै न ऊंघ भलियाईरा कशगने रै नाशा बै ।
 पर महाराज गल सुलटी ता अंढी ती जै, कौम थी ता आपू आधी शाधी लेंदें आसा बै ।
 छौड़ी बड़ियाई केरी भूरी दया आसा पांधौ, केरिए पवित्र औज आसरै निवासा बै ।
 केरीदेआ हुकम जै होला कौम आसाजोगा, मिली जालाचाकरीरा पुन मूं बै दासा बै ॥ २८

दोहा :- आदरै री गला शुणी, तिने सराहै राम ।
 तिनै नूं अंढा दूणदा, सूर्ज कुलौरी जाम ॥ २९

राम जी रै गुण ता सभाओ बै सराहिदेआ, बोलै भूरदेआ शुण राम अंढी गल सा ।
 सोहू महाराज होरै तीनै देणी राज गदी, केरु इंतजाम पोरै सबीगैऊ जलसा ।

केरी लई औजा न बंधेज ब्रह्मचारी आला, विधि होऐ शास्त्ररै री एता न कुशल सा ।
 अंढी गल दसिए ता मुनि नौठा राजे आधै, सुन्या रोही शुणदेआ रामे री अकल सा ॥ ३०
 जौमै आसौ एकी जगा संध जबै सिभ भाई, खांदै, सौंदै सौंधै एक साथ न खलाऊऐ ।
 हुऐ थी जडोलण जनेऊ जबै एक साथ, सौंधै चार भाई आसौ कठ थी वियाहुऐ ।
 अंढै नामी कुला न ऐ गल गोई बड़ी माड़ी, बड़ा भाई राजा होछै भाऊ बछड़ाऊऐ ।
 भगतां रै मनै रा बकार हुआ दूर जबै, भाऊआं री भूरी लायै राम पछताऊऐ ॥ ३१

दोहा लछमण ता बै पोहुता, मनदा खुशी अनंद ।

आदर मानै दूणिऐ, पुजै श्री राम चंद ॥ ३२

बाजै लागै जोधया न भांतो भांत बाजदै ता, मौज मजा नगरा न सौऊतै मनाइदा ।
 लोका थी निहालदै जै पूजी जांदा भरत बी, हौखी रा सुआद कोई तेई रै बी पाईदा ।
 हाटी ता बाजार सौंधै गौल्ही-गौल्ही घोर-घोर, बेटड़ी ता मरधा न चरचा शणाइदा ।
 काल कबै जैहै होला लगन सौ तिलकै रा, होणी जबै राजगदी कौम मन चांहीदा ॥ ३३
 बेसी जांदै सीता सुध सुनै रै संधासणा न, होई जांदी मनै री मरादा अंढी सोठदै ।
 लोका थी निहालदै जै कबै जैहै काल होदी, देवतै थी सोठदै जै कंदै गादी ठाकदै ।
 देवतै नी गौमी अंढो जोधआ री धूम-धाम, चोरा बं नी प्यारै जंदै जोथ प्यासै लागदै ।
 बार-बार जौवा वौंदी देवतेआं देवी री जै, देवतै रा कल्याण केर माई शारदै ॥ ३४

विपता आसरी भालिए, केर जतन तू औज ।

राम चन्द्रा बनवास दे, केर आसरी मौज ॥ ३५

देवतै री गल बणी दुखी हुई सरसुती कमलै, रै बौणा जंडा पौउ हीउ पाला सा ।
 भाल पछतांदी देवी केरी भीरी अरज जै, माता तौब रती नई दोष एणू आला सा ।
 राम जी बै खुशी ता वसोपत किछ लागदा नी, तू ता माता खरी तहै तीना जाणा भाला सा ।
 जा तू माता बुधिया बै आसा देवतै री तौयें, जीउ सभ करमे रा दुख मुख भाला सा ॥ ३६
 रोहा ता सी सरगा न कौम केरा निशठे सी, होरी री भलाई कदी देवतेआं साधी नी ।
 होणहार आगली रा केरु जै बचार तेसी, बुरा कौम मनणा ऐ कदी कौसी कवि नी ।
 तबी नीठी शीऐ सौ दशरथ नगरी न जंदै, ग्रहदशा कोई करड़ी सा पाई धीनी ॥ ३७

मूरख बेटड़ी मंथरा, कँकेई री नकराणि ।

अकल मारिए तेसरी, बदनामी बँ आणि ॥ ३८

भालू जबें मंथरे नगर भकमकदा ता, चौऊ पासो बाजा गाजा बाजदा बधाई रा ।
 पूछे तेसों लोका अंदी कीजी री सा धूम धाम, शूणू राज तिलक ता होल पोऊ दाही रा ।
 लोहू तेसो मूरख कजातणिए "कंढी तहँ रातो रात बिगड़दा कीम ऐ बणाई रा" ।
 जठे कोई जंगली री बेटड़ी 'मखीरा माले छतें तयें जतन बचारदी सफाई रा ॥ ३९
 होयें बड़ें दुखी तबें नोठी कँकेयो आगें, होसदेआ पूछी कीबें मंथरा दुआस सा ।
 इस्तरी चलितरै रै होखू रोही शेटदी जबाब नीछी देई लागा लोमा लोमा स्वास सा ।
 'धीनीं होली लछमणे अकल ऐ बूझिया सा; बोलू राणी होसिए तू केरा बकवास सा ।
 नीछी हूणी तबें बी सी दासी रौंड पापन ता खड़पणी साही लाऊ छोड़ना सुआस सा ॥ ४०

दोहा:- बोलू राणिए डोरदै, तू हूणदी किवें नीं ।

महाराज ता राम बी, राजी खुशी ता सी ॥ ४१

लछमण, भरत ता शुघन, सिभि री खबर शणा ।

अंढा शूणू मंथरे, लागी कालजें दा: ॥ ४२

कीबें कोई आसा बें पढाला माई अकल ता, आसरा सा कौसरा जें बकवास केरना ।
 मौउजी न कुण रामचंदरा न पोरे अोज राजें लाउ बुण अोज गादी न बशेरना ।
 भाग हुए शोभले कशल्या रें बड़े जूणी कठण धमांड हुआ कालजें पड़ेरना ।
 भाली धूम धाम हुई दाह बड़ी मेरे मना, अंढा ठाठ बाठ तूसा आपू जायें हेरना ॥ ४३
 बेटा परदेशा न नी भौख रती नेरे मना, बूझा सी जें महाराज काबू मेरे आई रें ।
 पलंग तलाई पांघें नीज मीठी एंदी तुसां, भाली दा नी खोट राजा जी री चतराई रें ।
 शूणी मीठी गला मन कपटण जाणिए ता फिड़किए बोलू चुपमोर फाफा कुटणी ।
 हूजी घेरें हूणली जें अंढा घोर फोड़नीऐ तेरी लोमी जिभ भूं सा खरी तई हूणनी ॥ ४४

दोहा:- साटे काणे कूबड़ें, कपटि मौझरी जाणि ।

बेटड़ी सी बी सेउका, बोलिए मुसकी राणी ॥ ४५

धीनी में सलाह तोबें हायें भल बोलणीए, सुपने बी ती पांघें भीक मूबें आई नी ।
 जदी तेरी गल होली पूरी सी है बन भाग, तेई व्याड़ें साही कोई घड़ी सुखदाई नी ।

बडा भाई मालक ता हछै भाई सेवादार, आस रवि कुलै री ऐ नीत बसराई नी ।
 सच जाणी कालहोला रामाबै जे राजटीका, भाली तौबै धीनी मुहामौगी मै वधाई नी ॥ ४६
 सिभ आसै सी कशल्या साही एक सार, एक जेही आसै राम चंदरा पियारी सी ।
 मू पांघै रामै रा पियार किछ बधका सा, परखी मै कई घेरे भूरी है नुआरी सी ।
 मू बै ता जैदेला ब्रह्मा आगला जनम तबै राम चंदरा लोड़ी बेटा न्हूश सीता प्यारी सी ।
 प्राण न बी बधका पियारा मू बै राम चंदर, राजा होला तेरे मना कीबै लागी आरी सी ॥ ४७

दोहा : भरते रै सोः बोलू तू, कपट छौडिऐ बैर ।

खुशी न ता दुख केरदी, कारण प्रगटा केर ॥ ४८

एकी घेरे दूणिऐ है पाई लैई पूरी मै ता, दूजी घेरें दूणनू ता जिभ रोटी लूणिऐ ।
 भौनणे है जुगता कपाल सा नभागा मेरा, दुख हुआ तूसा भल आली गल शूणिऐ ।
 हाऊं लागी कडुई ता ने लागै मीठै तूसा, केरा सी जे मीठी भूठी गला गौठी दूणिऐ ।
 आगो बै के राम अबै आसै बी खशामदी है, नी ता रात ध्याड़ चुप बेशी रोहै कूणिऐ ॥ ४९
 केरी परमेसरै करुण हुई वेबश, धीना मोहै मिलणा जे बाहू सोहै लूणना ।
 कोई बणे राजा होणा आसा नै की बाधा घाटा रौःणा नकराणी आसा राणी नई वणना ।
 आसरा सभाऊ गोऊ बड़ै वूदै फूकणे बै, बुरा होए तूसरा सी जाईदा नी भलणा ।
 तेसो गलै लाई थी मै गल बोगते री, हुई मेरी बडी भूल राणी षोड माफी माँगणा ॥ ५०

दोहा : मीठी कपटी गला शूणी, बेटड़ी बुधणि राणि ।

देवे री मायै मोहुई, लाई सो पतियाणि ॥ ५१

घड़ी घड़ी आदरा न लागी राणी पूछदी सा जंढै गीता गायै मोहा भीलणी सा हिरनी ।
 सोठू जंढा मंथरै थी दाऊ तंढा लोगा गैऊ, जंढी होणहार होणी तंढी बुध फिरनी ।
 तूसो पूछा सी ता मू बै दूणदेआ डोर लागी घोर फोड मेरा नां फीरी तूसो धरनी ।
 खरी तहें परखु वशाह तवै जोधेआरी, लाई साढ़सती ऐ कपट गला भौरनी ॥ ५२
 बोलू तूसो राम सीता तूसा नै पियारै जंढै, राम नै बी तूसा सँघे तेबड़ा पियार सा ।
 चलै नौठे अर्नो ध्याड़ें तंढी जवै गल होंदी, प्यारै बी बणा सी वैंरी बोगते री मार सा ।
 पाला सा सूरज जूण कमलै री फसला नै, रुड़ी मौमै सोहै केरी देंदा तेई छार सा ।
 सौहुकण तूसारा जलाड़ा चाह पेचणा सा, तेई नै बचाणे तैयै लाणा फेर वाड़ सा ॥ ५३

दोहा:- सुहाग भरोसै फिक्र नी, कावू न बुझिए राऽ ।

मन कपटी मीठी गला, तुसरा भोला सभाऽ ॥ ५४

चतर चलाक बड़ी रामचंदरै री आमा, कौम तेसै कौढी लैउ दाऊजेहा लाइए ।
भेजी धीना भरत ता राजे माउलै री धीरै, हुआ सभ कौम ऐ कशल्या री सलाहिए ।
होरा सिभ सौहुकणी शोभली सी मूं सेंधै, अकड़ा सा राजे पीछे भरते री माई ऐ ।
जौलनी सा तुसरी कशल्या बै माई होरो, प्रगट नी केरदी कपट चतराइए ॥ ५५
तुसा पांधै राजे रा पियार बडा भलीदानी, सौकणी रा होदा आऊ अंढा है सभाउ सा ।
केरु तेसै घोला मोला राजा कावू केरु, रामचंदरै रें तिलका बै लगन गणाऊ सा ।
गदी राम चंदरा बै गल खान दानी, ठीक लागी साभी लोका बै ता मूं बी बडा चाऊ सा ।
डौर लागी मूं बै आगै एंदी गला सोठदेआ, लोडी भगवान केरे फौल तेसै पाऊ सा ॥ ५६

दोहा:- करोड़ा मेंभर गौंठिए, ताणु कपटी रा जाल ।

शौउ कथ शौकणि री दसी, होए भीक बुआल ॥ ५७

होण हार अंढी थी ता धीजा आउ राणी बै बी, पुछी सौ सगंधी शौऊ देयै तबै राणीऐ ।
हाजी बी नी पयाड़ी अबै पुछणा की रौहु तुसा, घाटा बाधा पशु बी सी जाणा पछियाणिए ।
हुआ औधा म्हीना ईना सज धज केरदेआ, तुसा लागी पता ओज सौवी मूं न जाणिए ।
खांदी लांदी लागीरी सा तुसारै है राजा मोंके, सची गला दसणे न दोष की सा राणिए ॥ ५८
गौंठी गांठी दूणनू जै भूठी गला तुसा सेंधै, देला भगवान मूं बै डोंडएसा गलै रा ।
होई जाला रामा बै जै काल राज तिलक ता, विपता रा बेजा तौबै बाह्या नी भलै रा ।
बणी जाणा तंडी तुसा जढी म्हौखी दुधै री सी रेख देयै दूणा सा ऐ बोल मेरें बलैरा ।
बेटै सुध केरली तू नौकरी जै इनरी ता, रौही एई घोगा सा पुआऊ तेरै भलै रा ॥ ५९

बिनता दखेरी कद्रऐ, तुसा कशल्या दखा लि ।

लछमण संधी केरिए, भरता कैदी पालि ॥ ६०

गला शूणी करडी ता कैकेई डौरी गई, नोली किछ दूणी सीधी शूकी डौरें लाईए ।
देही पौऐ पौरसू ता कौभी केले पोचा साही, डाही डौरें तेसै जिभ दौंदान दवाइए ।
क्रोड़ा कथा कपटै री तेसी शणियाई जौस गलै सब केरै राणी मन समझाइए ।
भाग आए खोटै लागी कपटण प्यारी नीछी रौजी हंसणी रें धोखे वगली सराहिए ॥ ६१

मंथरा तू शुभ तेरी सिन गला सची लांगी, मेरी सीधी हौखी रोज रोहासा फड़कदी ।
 राती रोज होमा सी धियाड़ बुरे सुपने ता तो सैंबी ठूणी नौली
 केरनू कीमांदिऐ सभाऊ गोउ सीधा मेरा, दैहणी ता बांवीं गला मूबे नी रड़कदी ।

आपूत सार नी ओज तइ, बुरा कौसिरा केरू ।

कुणि लायै मूबै भला, दुःख एतरा पेरू ॥ ६३

रौही जानू पेउके उबर भर बण्ही जायै, केरदी नी जीदें जीवें सौहुकणी री चाकरी ।
 बैरी रें धीन जीणा जीस देऐ भगवान, मोरना सा भला तेई जीणे न ता मंथरी ।
 अंढी गला धीनगी री ठूणी बोहू राणिए ता इस्तरी चलितर चलादी लागी कुबड़ी ।
 अंढा कंढा बोलासी केरिए मन धाउड़ा जी दिन दुणा बवै तेरा सुख ता सुहागरी । ६४

जुणिए नै सोठी होकी बरयाई तुसरी ता मिलू लोड़ी ते ही बै सा फौल एई पापैरा ।
 जरी नोरे मैकर ऐ गुगू बभियाणिए मै, नीत्र सुख नौठी नाधियान रौह आपैरा ।
 पुछै भुगी लोक तीनै रेख पायै बोलू सच, मिली जाणा भरता बै अबधैरा राज सा ।
 सेवा लायै तुसरीऐ वशान सी महाराज, केरनी ता दसी देनू ऐतैराज लाज सा ॥ ६५

लाडं बेटे छोड़नू, खूहै देनू छान ।

मेरी तीयें बोलदी, किनै नु केरनू भाल ॥ ६६

केरी मगनूर कैकेई कुबड़िए तबै काटै री मन पाथरा न पलोइए ।
 एंढो बिषा रागी रै सी भाजुई थीं तंडै जंढे ढगीदा बौलीरा पणु हौरें घाहा हेरिए ।
 गुगी गज भीजी पर अंता पंधै खोरी जुग मादुरा थी धोलू उजै म्ही खरतडाइए ।
 तबै बोलू आद होली तुमागीकी न होली, डाहीरीसा एक मल तुसै सणियाइए ॥ ६७

दुई बरदान राजै आगेंसी अमानत जे मौगी लैली तीनां ओज छाती केरी ठढी तू ।
 भरला बी राज बनवास रामचंदरो नै मोगिए ता सौकणीरी चोड़ चांडा अंढीतू ।
 राजा जवै केरला संगव रामचंदरै री तबै मौगी नई ता नी लोड़ी राजा बदले ।
 छुटी रात ओजकी ता होई जाणा वड़ा द्रोह, तुसै मन लायै मेरी ईना गला मनलै ॥ ६८

पापणिए दा - लाइए बोलु कोप घोर जा ।

कौम सम्हालिये केरेई, भेंट पट मत मनी जा ॥ ६६

जानी न पियारी बुझी राणिए सौ कुबड़ीता, बार-बार लागी तेसा अकली सराहंदी ।
तो साही आपणा नी दुनिया न कोई मेरा बाल धीना मूं बै लागी पाणीन थी बौहंदी ॥
एई ठबें काल मेरे होली पूरी मनैरी ता तो बै भाऊ साहीईना होखी मौंभै डाहंदी ।
बोहू तहें कुबड़ी बै आदरता मान देयो, केकई नौठी कोप भवना न रोहंदी ॥ ७०

जीमी बणी केकई ता तेसरी कबुद्धि वरसात बणी मंथरा बेजा विपतारा बाहुआ ।
कपटे रा पाणी पौऊ जौमु बेजा सरभर, दुई बोर पौच लागै फौल दुख आउआ ॥
केरिए समान कोप भवना न जाई सुती केरदी थी राज सौ कुमतिऐ गुआउआ ।
नगरा ता बेठें मौंभै धूम-धाम बड़ी भारी, एई घोलै मोलै रानी थोघ कोइ लाउआ ॥ ७१

नर नारी सारें खुशी, सजदें मंगल चार ।

तुरदें कोई निकलदे, बड़ी भीड़ दरबार ॥ ७२

यार बचपणे रै ते खुशी खुशी मनै सिभ पौंज पौंज दस दस रामा आगं एजदें ।
राम जी रा प्रेम पछियाणिए सराहिआ सी, मीठी मीठी गला सेंघें हाल चाल पुछदें ॥
राम जी री केरदें सराहुति ते, आपू मौंभै, पूछी पाछी राम जी बै घौरा धीरै फिरदें ।
कुण रघुबीरा साही होला एसादुनिया न नीउते सभाउए पियारा बै नभेरेदें ! ७३

करमै रै फौलै आसै जौस जौस जूनी जालै एक गल भगवान आसा बै दियादें ।
असै लोड़ी सेउक ता सियापति मालकए, इना मतै फीरी तौयें आसाबै नभाई दें ॥
अदी मन इछया थी नगरा न सभीरी ता केकई राणी होरा मनोमन दाही दें ।
नीच मतै भौघ नई अकल ठकाणे रौंदी पौड़िए कसंगती न कुणनी मटाई दें ॥ ७४

राजा खुशिए सौंभकै, केकई आगे आए ।

देह धारिए भूरि बुझ, भीका आगे जाए ॥ ७५

शूणू कोप भवने रा नां राजा ठिठकुआ, आगे नीछी गौई पौड़ी मना मौंके डौरीए ।
 बला लायै जौसरै सा इंदर न डौरा रौहा, जीया होर राजै सी जौसरा रेवा हेरिऐ ।
 सौहै राजा शुकी गंड बेटड़ी री भीका शूणी, भाला करामात बड्याई कामदेव री ऐ
 मारै कामदेव ते है फुला अल बाणे जुण, मारीदे नी बज्र शूल खड्ग तलवारीए ॥ ७६
 डौरदेआ तबै राजा नौठा प्यारी राणी आगे, भालू हाल चाल दुख हुआ बडाभारी थी ।
 धौरनी थी लेटी री ता कपड़े पराणे लायै भांतो - भांते भांडे डहै अंगारै तुआरी थी ।
 कंठा एसै मूरखै कशगगे रा कौम केरू, रौंडीणेरी घीनी जढ आणी होणहारी थी ।
 कौस गले रुशी रौही दस मेरी प्राण जानी, नेड़ जायै दूणी राजै गल मोठी प्यारी थी ॥ ७७

छंद :- कारणे कुणिए भिकुऐ राणी जी, छुंघदै लागै ता होथ डकाऊ ।
 बुभणा भिकुई नागणी कालीऐ, भिक घरौछिए हेरना लाऊ ।
 भाभा थी दूई ते बणी थी जीभा, दौद ते बीर निहालदै दाऊ ।
 तुलसी होणी रै चकरै राजा कामै रा चकमा लेखे न पाऊ ॥ ७८

दोहा :- बांकी हौखणी कंठणी, घड़ि-घड़ि बोलै राऽ ।
 कोपैरा गज गामनी, कारण मूं बँ शणाऽ ॥ ७९

बोल प्यारी कुणी जणे केरू तेरा बुरा दुई मुंड कौसरै ता जम कौस चाहा नेणा सा ।
 बोल कौस मंगतै बणाई देनू राजा औज बोल कौस राजें बँ नकाला औज देणा सा ।
 तेरै बैरी देवते बी मारी हाऊं सकदा मकोड़े साही, लोक छुंड छाडणा नगीणा सा ।
 हांड तेरै मुखा चंद्रामांए रा चकोर सा सभावा एई मेरे तूता सही तहँ जाणा सा ॥ ८०
 मेरे ता पराण परूआर बेटे सरबस, परजा समेत तेरै बशासी पियारिए ।
 केरा सा सगंध हाऊं रालचंद्र बेटे री जें केरिऐ कपट तौबे दूणा होला आहिए ।
 हौसिए तू मौंग मूं न मन चाही गला केर बांकी कायापांधे गहणे कपड़े शंगारिए ।
 वीगत कवोगत फियाड़िए वचार केर, शेट अर्ब कोपा आल कपड़े तुआरिए ॥ ८१

दोहा:—

शुणि सगंध खुशिए उठी, गहणे लांदि गुआर ।

हिरना भालिए हेड़नी, केरदी फाहि तियार ॥ ८२

फीरी बोलू राजें तेसा भली माणू जाणदेआ मीठी मीठी गला बाता दूणिए पियारै री
केरी धीनी मनैरी मराद तेरी माँदिए मैं, धीर-धीर धूम माल नगरै री सारै री ।
सजी दै तू बांकीऐ शंगार अबै शुभाआलै केरी देणी राजगदी रामजी री दोतोऐ ।
शूणदेआ विदकीं नरौठी राणी केकई जंढे विदका सी पीके बाल तोडा कोतीऐ ॥ ८३

अंडी बडी दाह तेसै हौसिए गभेई जंढे चोरै री जनानी कोई प्रगटी नीरों दी सा ।
राजेंनी कियाड़ी चतराई कपटणि जुण कोड़ कपटी रै गुरु री पड़ाई होदी सा ।
राजनीति चतर थी राजा चाहो छूटा पर बेटड़ी चलितर समुदरा न गहरा ।
नकली पियार दरशायै तबै बोलू तेसै हौसदै मरोकदेआ हौखी होर चेहरा ॥ ८४

दोहा:—

मौंग मौंग ता बोलदे, देण लैण नी बास ।

दुई वर देणे केरिरै, मिलणे री नी आश ॥ ८५

कियाड़ी जेही राजें तबै हौसदेआ बोलू तीबै सीभी न पियारी लागा मान ता बड़ाई सा ।
डाहीरी अमानत नी माँगी कि बै ओजा तये भलककड़ सभाउ मैं बी आद बसराई सा ।
भूऽ मूठ दोष मत देआ तुसै आसा बै ता चार माँगी लैआ तुसै दूई री की लाई सा ।
प्रण चले जान पर वचन नी जाणे दें दै म्हारे रघुकुलै री ऐ रीत चली आई सा ॥ ८६
बोहू सारै पाप बी नी एकी भूठा जे तरै, नी रतियां करोड़ा लायै परबत बणादा ।
सीभी पुताधरमे रा मूल सचियाई, सभ वेद ता पुराण मनु महाराज मनदा ।
तेता पांधे रामे री सगंध रौही खाउ इऐ, मेरे पुता प्यारै री सा राम हृद आखिरी ।
केरो गल पक्की बोलू हौसदै कबुधणिए, बाजै री कमति रै जै सोल्ही टोपी हौखी री ॥ ८७

रामचंद्र जी रै जनम लेणे रा एक कारण—१३

राजा प्रताप भानू री कथा, रामायणे रै बालकांड न रामायणे (तुलसी दास जी री)
रै दोहे ता मैं कुल्लू री बोली न दोहै है बणाइऐ लिखे पर चपाई रा बेउरा कुलुई चपाई

लिखै पर चपाई रा बेउरा कुलुई चपाई न नीआ औपड़ी, तबे में बोहू जैहैया ३१ आखरे
 साँद डेक छंद आहू, उई न तुलसी दास जी रे एकी एकी शब्द रा पूरा-पूरा मतलब कुलुई
 बोली न भौरू दासा, एतैरा पता समायणा सेंधे मलान करिए लांगी सका सा। सेंधे
 कवितान तोल ता गिणती काईसु डाहणे री तयें शब्द आगें पिछे करने पौड़ा सी दोहै दाहै
 न ता मात्रा री गिणती तयें कोहरें शब्द दोहरें ता दोहरें रे कोहरें करने पौड़ा सी तबे
 पौढ़ने ता फयाड़ने न जरा कष्टो होआ सा, छंदा कविता रा काईदा होआ सा जे तिनरा
 तोल भाख एजी जाऐ तबे पे पूरा मजा एजा सा। अठा है स्हाव पिछली कविता रा बूझणा
 ऐ दूहै प्रसंग धाउड़े सी तूई री तयें हाऊ माफी चाहं सा।

बाल कांड १५२ दोहे न आगै (रमायण गीता प्रेस)

शुणा मुनि कथा सा पराणी ता पवितर जे, पारबती आगें शिव शंकरें शुणाई थी।
 प्रसिद्ध सारी दुनिया न दश एक कैकय सत्यकेतु राजे तोखें राजगदी पाई थी।
 बड़ा जाणकार धरमात्मा थी राजा परताप तेज न्याउ ता नसाफ बडियाई थी।
 दूई बेटे हुए तेई राजें रे थी जाणकार, होनहार जोधे वीर बडे दूहै भाई थी ॥ १

जेठा बेटा जुण राज पाणू आला टिकका जे थी तेईरा थीनां "परताप भानु" डाहीरा।
 कोन्हा "अरिमरदन" काँउर थी जुण सी बी, डटणिया जुमान नथोघा जोरो बांही रा।
 कोई छल कपट बरोव तीना आथी नी ती, आपू न पियार भूरी बड़ा दूही भाई रा।
 थीना राज राजे "परताप भानु" टिके नेता आपू बीणा घूणा तप करने बी लाईरा ॥ २

दीहा :- प्रताप भानु राजा बणू, देशा फिरी दुहाई।

धरम परजा पालदा, शेरू पाष मकाई ॥ ३

तंडा है वजीर 'धर्मरुचि' जंडा शुकरी थी राजे री भलाई आला चतर सजान थी।
 आपू परतापी सेंधे जोधा रण धीर थी ता मंतरी सियाण थी ता भाई बलवान थी।
 चतुरंग फौजजा नगोणी आपू आगें थी ता भादर लडाके वीर फौजजा जुआन थी।
 भाली जब फौजजा ता राजा परसन्न हुआ खुशी रे दमामे बाजें उडदे नशाण थी ॥ ४

जीतणे री लेंधे थी बणाई फौज - फाण तबे हेरिए घियाड़ा चहू डंका बजाईए।
 जमा-जमा बीता न सड़ाई हुई बोहू सारी बोहू सारे राजे जीते जबर लड़ाईए।

सोत द्वीप जीतें जोर बबरिऐ कामू केरें, छोड़ें केरें जीतिऐ ते इंड भइलाईऐ ।
एक थी प्रताप भानु चमकीरा तेई समे सारी दुनिया न जश आपणा फलाईऐ । ५

दोहा :— जोरें दुनिया जीतिऐ, नगरा केरु प्रवेश ।
फोल आई है वगैरें, पांदा रोहु नरेश ॥ ३

परतापा लायै परताप भानु राजें रें, ऐ कामधेनु साही हुई पृथ्वी सुहाउणी ।
कोई दुख रोहु नई बरजा न सुख बिसू, धर्मी हुऐ मर्ध सती बेटडी सुहाउणी ।
भक्त भगवाने रा बजीर धर्म रुचि चुणी राजैरें भलैवें नितनौवी नीत आणनी ।
गुरु देउ ब्राह्मण ना संत होर पितरैरी केरा रोज राजा भी सभी री मन भाउणी ॥ ७

शास्तरान जे नाम धर्म लिखे राजेभरि तीना सोभी माना सैवें केरिऐ सुख मना थी ।
रोज रोज केरा थी सो दान भांति भांति रें ता वेद ता पुराणा रोज गुणा थी ता गुणा थी ।
बोहू सारें बाउडी तलाई खूहै जगा जगा फूलैरें बगीचें बाग बांके रोज बणा थी ।
ब्राह्मणे रें घोर देऊ मंदर थी बांके बांकी तीरथ बांचतर बणाए कई गुणा थी ॥ ८

दोहा :— जो पुराण वेदे दसै केरें ते सभ जाग ।
भार भार बारी सभै, केरें ते बे लाग ॥ ६

फोलेरी नी भाभा कोई राजैरें थी मना मोभे अंदा राजा बुद्धिमान चतर सजान थी ।
धरम करम मन बाणी सैवें केरें अमु अरपण अंदा हुआ राजा ज्ञान बान थी ।
एकी घेरें बांके जेहै घोड़े पांघरें चढ़िऐ सो, हेडै, खेल्हीणो रा सारा सजिए अमान थी ।
विध्याचल परवता नोडां घोणे बोणा मोभे बोहू सारें मिरगैरी कौडी शेटी जान थी ॥ १०

भानु राजे सूर एक फिरदा थी बोणा जंदा राहु ग्रह सोभुआ चंदर माबें ग्रसिए ।
बडा मोड चंदर सो नीछा खाखी ओपड़ीऐ नोबू भीकें गुनी रोहू होऐ गोला फसिए ।
अंदा सो डराउणा थी सूर भारी कायाता डराउणी नुहार लागी डोर दोदा देखिए ।
छेड़ गुणी घोड़े तबें लाग़ा घुर धुरदा हेरान होय बालदा सो कोना खंडे चकिए ॥ ११

दोहा :— नीलें जीतै री चूल जां भालू मोटा सूर ।
राजें रें रोकुआ नई, घोड़े मारी हूर ॥ १२

जबै छेड़ गुणी सूरें घोड़ें री जेनेड़ एंदी मारी तेयो ठोर जंढी बागरी री जालिए
भट पट राजे बी चढ़ाऊ तीर धनबा न बेशी गेऊ घोरनी सो सूर तीर भालिए

ताक लायें मारें केरें बाण राजें केतरें वचाए केरी जान सूरें चाल बाज छलिए ।
 गोभीदा ता प्रगदीदा रोहू सूर भगदा सौ भीकें लायें रोहू राजा पीछें पीछें चौलिये ॥ १३
 बडी दूर निकता सौ सूर घौणें जंगलान जोखें हाथी घोड़ें नी थी कदी तूरी सकदै ।
 केलहा रोहू राजा बौणा जूनीविथा बडी भारी तबें बी नी राजा बौत राजा हेड़ें थी छोडदा
 सूरें जबें भालू राजा जिगरें हिआउ आला, तूरु डूधी जुधली द डोरें ठोर भगदा ।
 जबै हेड राजें आगे वधणे बें बौत नई, भूली गेउ बौत पछताइए थी हटदा ॥ १४

दोहा :— थकिए भुखुआ शोखुआ, राजा घोड़ें सुध ।
 नौई सौरा तोपदा, पाणी बाकि वसुधा ॥ १५

भटकदै भालू एक आशरम बौणा मौंभै रोहूदा थी राजा एक ऋषि आलै भेषा न ।
 जी सरा थी देश परताप भाने जीतू होंदा छोडीए लड़ाई फौज भगीरा थी देशा न ।
 चमकदै भाग परताप भानुरें फियाडें आपणे ता डुबदै फियाडें चौउ दिशा न ।
 नौ ऽ नी ती घौरा बी सौ हारु होंदा राजा लोजें हेरुआ रियासती रें कौसी बी मनुषान ॥ १६
 भीक जीकी मना मौंभ डेठी बणू रोहू बौणा कुटिया बणाइए तपस्सी साही बणिये ।
 तेई आगे नौठा राजा तेयौ पछियाणी लैऊ कपटी तपस्सी राजौ बोलू पछियाणिये ।
 भूखें शौखें राजें तबें नोली पछियाण केरी जटा जूटा आलै तेई ऋषि मुनि जाणिये ।
 ओथा घोड़ें पांघे न ता टेकी घीना मौथा सेंघें केरिये चलाकी नांद स्सू नई जाणिये ॥ १७

दोहा :— राजा शोखा जाणिये घीना सौर रिहाई ।
 पाणी पीऊ घोड़ें सुध दुहिये शांति पाई ॥ १८

उतरी थकाउट ता राम बुभु राजें तबें कुटिया बें आपणी सौ साधु लैई गौऊ थी ।
 ओउडू थियाडा भालू रोहणे बें बोलू मीठी मीठी गलै डेंदिये सौ राजा मोही लैऊ थी ।
 कुण सी जी तुसै कीबै भटकदै बौणा केलहै बांकी सी जुआ न कीध जानी पांघे खेलदै ।
 लछण सी तुसारें ता जंडे चक्रवर्ती आले भावदेआ मना न वचार लागे एज दै ॥ १९
 राजा सा प्रताप भानु गुणात महातमा जी बडा है प्रतापी हांऊं तेईरा वजीर सा ।
 खेल्हीदा थी हेडा पर बौत में बिसरि पाई तुसरें चरणा पुबू मेरी तकौहर सा ।
 दरशणा तुसरें नियमत सौ आसा बी ता होणहार भली होणी कोई गंभीर सा ।
 तबै बोलू साधुए निहारुआ बोगत अबै सतर योजन तेरा घौर दर वीर सा ॥ २०

दोहा :— रात निहारी घौर बणा रहना नी महाराज ।
 जाइत रात विहाइए, राती रोहा ओज ॥ २१

दोहा :— रात निहारी घोर बण, रस्ता नी महाराज ।

जाइत रात विहाइए, राती रोहा ओज ॥ २१

होणी जंढी होया सा, तंढा मिलदा मेल ।

आपु नि कोछे एजदा, तेई नेंदा नेड़ ॥ २२

साधु जी र हुकमा बे मनिए प्रताप भानु राजा बेशी गैऊ घौड़ें बूट सघ बौन्हीए ।

तब केरी साधु री सराहुती बी बडी भारी आपणें बी भागै री चरण बौंदी-बौंदीए ।

सौधी दूणी मीठी गला मी ीए जभानीए जे केरी में शरेड़ा माई बापू तुसा मनिए ।

मूं बै महाराज बुझा बेटा सौघे चाकर बी नां जाः दस्सीदेया आपणी जभानिए ॥ २३

राजै पछियाणू नी ता तेयै पछियाणी लैऊ, भोला भाला साधु चतर चलाक थी ।

एक ता थी वैरी दूजा छत्री सौबी राजा तेई कोहणा थी कौम छल कपटै ऐ ताक थी ।

सोही-सोठी राज सुख रोहा थी सौ जौलदा आवे साही धुखे केरी छाती न कड़क थी ।

सोधी गला जबै दूणी तेयै राजै री ता अंढा वणू छोड़ जंढा वैर खतरनाक थी ॥ २४

दोहा :— कपट भौरि मीठी गला, केरी तेयै अजीव ।

नां मेरा डैठी अबै, घौरा बाझि गरीब ॥ २५

बोलू राजै तुसा साही ज्ञानें रै मठार पर गरब घमंड डहै जुणिए नभेरिए ।

सीभी तहें चतर ता जाणकार होदेया बी माड़ें भेषे रोहीरै सी आपू बै गभेरिए ।

तंढे ते नमूलै लोका हरि बै पियारै होदैं बोलू सत लोकें अंढा वेदा बै बचारिए ।

तूसा साही मोंगता गरीब ता न घौरा जुण, होया सा भरम शिव ब्रह्मो बै बी भल्लिए ॥ २६

तूसै जुण कोई होली मोथा टेकू चरणा न केरी देया दया तूसै मूं पांधें मालका ।

सीभी तहें राजै बै चजेरिए ता भूरदेया बोलू राजा ओखे हाऊ बौसू बोह सालका ॥ २७

दोहा :— हाजी नी मिलू कोई, ना मैं आपू शणाई ।

मशहूरी बीणा साही, तया बै देदी जलाई ॥ २८

भेषा न चतर नि भुलदें, ठगिया सी अणजाण ।

बांकी बोलि नुहारिए, सपें मोरै रा खाण ॥ २९

एसो गले रोहा सा संसारा मोंकें गुपता ता भगवाना पोरै नई मतलब कोईरा ।

जाणै सोहै सिभ किछ दसे बाझी, बोला तबै लोका पतियाणे रा की मतलब पौईरा ।

तूसौ चौखै चतरसी मेरे बड़े प्यारै बसुआस ता पियार तूसां मूं पाधै होईरा ।
अबै राजा हांऊ तूसा कौढी देनू फेटै तगै बडा भारी पाप दोष होणा मूं बै तौईरा ३० ॥
जीऊं जीऊं डेठीऐ दुआसी आली गला केरी तीऊ तीऊ राजै बै बग्याह लाग़ा बधदा ।
जबै भालू काबू हुआ मनै कोमै गलै बातै लाग़ा ठग मी ी गलै राजै होरा ठगदा ।
नां मेरा 'एक तन' शूणा तूमी महाराज, राजा बडी धीनगीऐ लाग़ा तबै पुछदा ३१ ॥

— जदी बणू संसार थी, तदी जोमु थी हाऊं ।

दूजी घेरं जोमु नी, तबै एक तनु नाऊ ३२ ॥

मत होऐ शुभ्र बेटा एसं गलै मना मोभै बडा सारी चीजा मोभै दुनिया न तप सा ।
तपो बला सैंधै ब्रह्मा रचदा संसारा बै ता तपो बला सैंधै केरा विशनु सारकशा ।
केरा तपो बला सैंधै शिवजी सा नाश अढा बडा है वचित्र तपो बला मोभै जश सा ।
खरी गोमी राजे बै ऐ गला जुणा तेयै हूणी आपणी पराणी जं शणाई तेयै कथ सा ३३ ॥
कर-मेरी, घर-मेरी, कथा वरशोहा साही केरी बोहू गला तेयै घरम गियानेरी ।
कथां लाई बडी मोठी लूण ता मसालै लायं दुनिया बै रचणे ता धाचणे मकाणेरी ।
ईना गला शुणदेआ हुआ राजा वशान ता केरी तेयो गल नां आपणा दर्शणेरी ।
बोलू तबै साधुऐ जै जाणा हाऊं साहै तौबै लाग़ी गल खरी मूं बै नां गभियाणेरी ३४ ॥

दोहा: — शुणा नीति राजा तुसे, सौउतै नीं लैंदे नां ।

मूं बै तेरी भूरि सा, चतराई मनी तां ३५ ॥

राजा तेरा नां सा प्रताप भानु पता मूं बै सत्यकेतु नां तेरे बापू जी रा पता सा ।
गुरु जी री किरपान पता सीभी गलैरा सा चींधिऐ नी दसू तबै आपणा ऐ मता सा ।
भाली लौई राजा आसै तेरी सीधयाई होर प्रीत परतीत होर नीति निपुणता सा ।
अबै तूसै पूछ ता शणानू कथ आपणी बै आसरै मनान आई तुसरी ममता सा ३६ ॥
हुआ परसन्न मेरे मनानी भरम रोहू भाभा जुणा मनान सी नेआ राजा मोंगिऐ ।
गूणी बांकी गला तबै हुआ राजा खुशी केरी बोहू भांति अरज साधुरी जींधा बोदीऐ ।
चार है पदारथ सी आऐ मेरें होथा पांधी दयारै समुद्र तेरे दरशन कैरिऐ ।
बभिया जी तबै बी प्रसन्न हुऐ भालऐता मोंगी लेनू बौर खुशी मालका बै हेरिऐ ३७ ॥

दोहा: — बुढ़िणा मोरना दाहिणा, जुधा नि लोड़ीहार ।

कल्प शौऊ आधीन हो, विणिह बेरी संसार ३८ ॥

(तबे साधुए बोनु)

जा राजा बीना बीर 'अंडा होई जाला' पर एक गल करडी सा तेसा डाही गुणिए
बाम्हणे री जातीन सुआए सारी दुनिया बी बोल देनू पाई तेरे चरणा न आणिए ।
तप बल बीना आगे तबे बडा बाह्यण सा कोप होऐ तेईरा बचाणा तबे कूणिए ।
जबे ईना बाम्हणा बी केरी लौले काबू तुसो विशनु बरह्य शिव वशा न सी एणिए ३६ ॥

चोलदा नी बाह्यणे री जाती सेंघे जीर बल सच दूणी देनू हांऊ दूही बांही चैकीऐ ।
लागला नू बाह्यणे रा तुसा बी शराप जै ता, होणा नई नाश तेरा डाहू आसी ठाकीऐ ।
खुशी हुआ राजा जबे गला म्हातम री गुणी पूछू महाराज मेरा नाश कदी होणा सा ।
तेरी किरपा न अने बाबा महाराज मूने आगे बी बी तुसा है कल्याण है कमौणा सा ४० ॥

जवाहर जोत - १४

दोहा :— तोखा माणू थो जवाहर लाल, एई जुग रा देउ ।
सभी देशो रा कौकड़ी कालजा चट थोसिए नेऊ ॥

कंठा शोभला भीतरै बाहरै खाख होसणु माली ।

भीर बौग तौ आइ डे कोऐ न तौबे मोरन ताली १ ॥
लागी कौसरो नजरा तौवै कौम खाखी री गाली ।

बौणा रुणे तौबे गोरु गुआलै रुणे छेता न हाली २ ॥
जीदं जीबे तौ देशा छड़ाणे बी बडी विषता घाली ।

जाती तौशिया छार बी आपणी सारै देशा न राली ३ ॥
तौ लायै थो नेह-चाचा सारै देशा न द्याली ।

बोत भालने बी सारै संसारा बी डाही जोत तैं बाली ४ ॥
वे बश, हुई इंदरा बिदरा चूटी ठौकणू डाली ।

सती हुई डे तेरे बजोगा न तेरी प्यारी मनाली ५ ॥

जुगनु जीजु-१५

जुगनु जीजु पराचंद होरा ।
मारदे कुणा निहारखी राती न ओरे न पौरे बी ठोरा ।

दूरद कीजी नै भाऊं भियाऊं कंढा ऐ ओरा ता पोरा १ ॥
 सरगा पांघे सी बादल ताणुऐ चौउ कनारै डपट्ट ।
 धीरनी आपणा आप नी भालीदा कीऐ न भालीणे होरा २ ॥
 निहारा पौईरा दवका अंढा बाहँ नी कोई बी एंदा ।
 खडी कियाडिऐ हौंढा थी जुणा ते गोभुई बेशी रें घीरा ३ ॥
 कंढे मसौलिये गाश बियाने न एक बरीबर प्याशा ।
 विजली लसकी गोभुऐ धिख ता ग्रूड न जतनी डोरा ४ ॥
 उडें बियाने की सरगा तारै ऐ तोपदें होली ठकाणे ।
 बांगला दे शीरे लोको रा जंढा जै आसरै दे शान जोरा ५ ॥
 अंढा सा बुझिया गौहरी लोके री आई जणितर बाल्ह ।
 होमा बै ओंथी कीं नाउरी अंबका भौखें मसौली शनोरा ६ ॥
 लागी नमू डें री होली की चाली आए ऐ गढिये होलें ।
 चुलकें टैंडें की बिजडी भेड़ा भालिये ब्राघा की चोरा ७ ॥
 हाँऊ निहारै न इंदर धनख तेई परांदे की होली ।
 सीभी रें होथा न शौली पियाशा, सीभीए मारदें ठोरा ८ ॥

फौजी वीर-१६

राजी रोहा भारतै रें जोघेओ जुआनो औज,
 गल सा जभाने पां घें तुसरी जमाने री ।
 सा बाशा यारो तुसे आन डाही भारतै री,
 नाश करु बैरीरा ता ल्हाशा बेईमाने री ।
 सोरै भाई साही हुई एक जान जबै सीभी,
 पारसी ईसाई सिख हिन्दू मुसरमाणे री ।
 शीऊं केरी शेट पेची नीऊ नाम फेटै जुणा,
 आए सीवा सैटै जबै बैरी हिन्दुस्ताने री १ ॥
 भारती जुआने थी समुंदारा न सेउ लाऊ,
 कथा नल नील जाम बंत हनुमाने री ।

चन्द्रगुप्त पोरस अशोक विक्रमेरी गला,
 केरी ताजी अजि पृथी राजै री चुहाने री ।
 बड़े बड़े जोधो वीर देशा पीछे जानी धीनी,
 शिवाजी प्रताप हुए बाल हिंदुआने री ।
 देश री आजादी पीछे गोली खाई लागै फाही,
 घाली लोकै कैइदी सा कथा बलिदाने री २ ॥

चार गेरै हमलै कराए ईने बैरी लोकै,
 कसर नी डाही तोफा तुक्का समाने री ।
 चेका चोड़ू चीने रा मरीकै रा मरोकु नाक,
 लका लकी बेठी बुरदाने री ईराने री ।
 मारै सेवर मिराज नैटा सैधे तूसै तंड जंडै,
 चीड़ू पांघौ बाज हुई जंग आसमाने री ।
 सरगा समुदरा न जोता न ता बंदरा न,
 बैइरी जुआन भूने भासी खीला धाने री ३ ॥
 धन धन जीउ ता हियाउ यारो जोधो वीरो,
 जीदें जीबै जान केरी जीउ रै नजरा ने री ।
 शाणहुएं जरीवा पांघो फरकदै हीवां पांघो,
 मुख री सीवां पांघो डौर नी बगाने री ।
 जोता गौहरै रा शोला पाला गाश पाणी हौड़ नाला
 घामे रा दुआला चाहो लू रेगिस्ताने री ।
 सीभी जगा एक सार औठ पौहर खबरदार,
 रौह दूर पार नई खबर जमाने री ४ ॥
 शेटै पंलग रजाई ठोकै ता मोरचै खाई,
 तूसै जानी री नी डाही भौख आपणे बगाने री ।
 भारती रै बेटै तूसै जबर कटेटै यार,
 हा:—केरी बैठै डाही शान खान दाने री ।
 बणू देश बांगला सौ छूटा ईना पछमी न,

य ह्या ता अयूब खांदे हवा जेलखाने री ।
लोहू रा जा होदा टीपू कवि रा नी हाजी खीपू,
चे, हुई तेतरे बेवश पाकिस्ताने री ॥

माण्हू री जात-१६

माण्हू जे म ण्हू री अकल केरा न देवा न बडी सा माण्हू री जात ।
घरमा धनैरी नसली जाती री चांडा सा चीधकी उलका पात ।

दया बी केरा न जीवा बी भूरान देवा न बडी थी माण्हू री जात
एक संसार ता देश नगौणे देशा देशान लाकें सी बोहू

लाकें न जिलें तसीला पचास्ती ग्रांए रा लेखा हिसाब भी रोहू ।
ग्रां न घोर ना घौरा ता टबर टबरा प्रति सी पारटी शौऊ ।

पारटी पारटी भौटी दी खांडी सीभी रें मनान कपट पौड ।
एकी है काया रें अंग सी सारें की केरनी एकीए दूजै री घात ।

दया जे केरा न जीवा बी भूरान देवान बडी थी माण्हू री जात १ ॥

ऋषिऐ केर थी वरण धार ता माण्हूएं ताणे ते चाल्ही हजार ।

उथड़े निशटे विमुऐ नापिए जाती रा पाती रा पाउ खलारा ।
लोड़ी थी सीभी रा धरम एक ता औज सा सीभी रा धरम न्यारा ।

मेरना बूटा न ढौकीदा कौसीरै डालू बी ढौकिए लाइ पकारा ।

एक प्रमेसर मूल सा सीभी रा प्रेम सा तेईरी धरम जात ।

माण्हूएं माण्हू री अकल केरा न देवा न बडी सा माण्हू री जात २ ॥
पूरबी पछमी उतरी दखणी एक संसारै री परजा सारी ।

कोल संगोल ता आरिए द्रावड़ हवशी गोरे सुमुदरा पीरा ।
मिल मजूर मजारें ता मालक घोड़ गुआर ता पिठ बगारी ।

होथ कमौणिए दस्तकारिए जीमी कशाण ता हाट बपारी ।
प्रोहत जमान वकील ता साईल मंतरी बोटर कर्मचारी ।

रंगे रा धनै रा कोमी रा फरक एता न पौरै नी गल ना बात ।

एसा जे गन्ना बें सिभ फियाड़ा न देवा न बड़ी थी माण्हू री जात ॥ ३
 जेतरी दुनिया भालुई कोसीऐ असल सार नी समझी जाणी ।
 कीड़ा ता पूजीरा कीसै रा कीसिए, दुनिया दिसदी रोही न शाणी ।
 कौसा बें तोषाम सिभ निहारै न टकरा मारदी विदरा काणी ।
 आपू सी पोकिया होरा बें पोकदे तबे बी खाया सा दुनियां स्याणी ।

बुध घुआड़दें मना बुहारदें छोड़दें दूजें नी लाणी जें घात ।
 जानै री जोत जगादें दें जें मना न देवा न बड़ी सा माण्हू री जात ॥ ४
 फेर बगीचे न कौंड री तारा,, मौमै सा कोरी ता बन्द दुआरा ।
 टांगुए पडदें तीरी दुआरी न चौड कनारै री बुदुई टारा ।
 सचै रा भेत पराणा सा कठण बेवश छुकुआ सिभ ससारा ।
 ज्ञाने रा कुथलु माण्हू रं मना न सो है पराला जें केरै बचारा ।
 ठगीणा कीजीबें डंडी पखंडी न, प्रेम नी बिकदा हाटी बजारा ।
 सचै पियारै री चिलक लागली, आपु भियाणी निहारखी रात
 हांदर होखी घुआड़िए भाले ता देवा न बड़ी सा माण्हू री जात ॥ ५

—ओउखी — सोउखी—

17

चिधिए देआ सी माण्हू बें दोष, ता चिधिए घोड़ा सा माण्हू वियाटा
 ओउखी सोउखी भाग री खेला, पोजणा सोहै जें बाहू रियाटा ।
 होसदें काटे थी सोउख घ्याड़े ओउखी आई ता होसदें काटा ॥

ख ऊ मखीर थी लोमिए जीभ विष बी पौउ सा चाखणा तोबै ।
 घोड़ा सा कौडें रें भोकड़ा तूरना, फूल री मोउजा लुटणी जवै ।
 फूल रा डोलरु लाऊ थी नाका न जुजली लागी ता होसणा अबै ।
 एई संसारै री रीत सा अंढी जे धूष ता छाऊं सी आपणे हवै ।

सुखे रै पौहरै केरदें मोउजा दुखे रै कुथलु भौरासी माटा ।
हौसदें काटा सी सुखे रै ध्याडें औउखी आई ता हौसदें काटा ॥ १

रौहला सदा जे मुस्करांदा ता करडी गला बी होणी सखाली ।
जीदेआ थकीरा माणू रा जीउडू केरला हौसला मारला छाली ।
आपूहै फिरनी पौधरी हौंडीऐ उथड़ी निशटी बौत जे भाली ।
हौसदी खाखीरै म्याणू बै भालीऐ रात विहाणी ऐ दुखे री काली ।
हौसी री विजली केरदी प्याशा भौनीऐ दुखे रै गूडू गर्नाटा ।
दुख ता सुख सी भागै री खेला औउखी आई ता हौसदें काटा ॥ २

उडदें ध्याडें रै पीऊलें धूपे बै शोहीऐ नेआ सा रात का निहारा ।
हटिऐ एजा सा दौतके बौगतै पीउली चिलक बांकी नुहारा ।
काले निहारै रै खोटणा पीछे सौ हिशदी बौती सा तोपदी भ्हास ।
एजणा एसरा बौगत एसो है केरना प्रगटा चार कनारा ।
उडदें ध्याडें सा भाडिया दुनिया रातका चूटा सा दोती सत्ताटा ।
हौसदें काटा सी सुखे रै ध्याडें, औउखी आई ता हौसदें काटा ॥ ३

शाधीऐ एंदा नी सुख ता कालेआ धाकीऐ जांदें दुखे रै ध्याडें ।
खडै नी रौहदें एकी है सौउचा निकली जाऽसी खरै ता माडें ।
खौदली निबली रौहा सी बौहंदी, माणू जे एतरी गल फियाडें ।
जीतीऐ बाल्हिऐ हारिऐ रोऐ नू, हारे नाह्याउ ना नीत बगाडें ।
कीजीरी छांटा सा भादरी बेबश, कीबै सा होरा बै रोयै भणाटा ।
हौसदें काटा सी सौउखी ध्याडें, औउखी आई ता हौसदें काटा ॥ ४

उआंसै रै काले निहारै न कुणिए भाले डें निल्हडें सरग तारै ।
कौलीरा लूवरु कबै भणादुआ घेरिऐ डाहू जे कौडें रै भारै ।
बादलै गूडू गर्नाटा न पीहू ऐ पीहक आपणी ठाकी नी यारै ।
खार समुदरा साम्हन भालिए पीछे नी हटदें नौई रै धारै ।
हादुआ कीबै डें औउखी भालीऐ, जोर जुआनी रा पौउ की घाटा ।
हौसदें काटी थी सुखे रै ध्याडें औउखी आई ता हौसदें काटा ॥ ५

जोखे सी कौड़े रे भोकड़ कालैया, तोखे पे सजा सा फूल बी शोभे ।
 जोखे न भुप निहारै रा दबका जुगनु जीजू सी चमका लोभे ।
 जीणे रा मजा नी किछ बी जबे जे लागे नी पींड न दुखी रे चोभे ।
 सुखी रा मजा सा बुझिया तदीहै दुखी जे भसक लाऐ नभो भे ।
 मुंडा गभेरदे एजणा सुखा बी दुखी री छाऊं न भालैई माता ।
 होसदे काटे थी सुखे रे ध्याडे ओउखी आई ता होसदे काटा ॥ ६

सुखी रा पौहरा घीना थी जुणिए माडे धियाडे बी सौहै रिहाऐ ।
 जुणिए भोर घड़ोलू न म्होखर कडुऐ विष बी तेइऐ डाहै ।
 बधकी गल नी दुख बी मादेआ एई संसारै री रीत है सा ऐ ।
 ओउखी सौउखी राती धियाड़ी सी, फिरदी घिरदी एंदी सभा है ।
 मनणी ओउखी देऊ रा बीर ता बुझणा दुख सा सुखी रा वाटा ।
 'बेवश' वणिए वेशी नी रोहणा चाहे हो काणा की लंगड़ा साटा ।

होसदे काटा थी सुखी रे ध्याडे, ओउखी आई ता होसदे जाट ॥ ७

—मेरी ठोकरू डालीऐ—

तौ बाभी रोह मन रात ध्याड भटकदा, अबे ता सम्हाल सीभी जानी री ऐ जानी ऐ ।
 छूठे पोथी पौतर ता देउ देवी संत साधु पुगती मताबक मै सिभ हेरे छानीऐ ।
 तौ बाभी रोह मन सदा है भटकदा, अबे ता सम्हाल सीभी जानी री ऐ जानी ऐ ।
 सीठी जेही तान जुण विउंशरी न निकती ती ठिमकीऐ शौधे न गभेई डाही चिड़िए ।
 डाली जुण रौंडुई थी शोइरे री बागरीऐ, डाही सौबी बासतौ शंगारीऐ ता पीढ़िए ।
 हींठा थी संजीवा जुण रोंद रोंदा दोथ होय सौभा बेठा वणिए सौ हाकम निहारै रा ।
 आऊ जबै जौगत नमूलां भिछया मोंगणीया बणी बेठा शाहूकार चौधरी बजारै रा ।
 एक हाऊ अंडा जुण डूबू ध्याड थाल्है थाल्है ठगू सरी आपणी है काया ता जुआनीऐ ।
 तौ बाभी रोह मन रात ध्याड भटकदा, अबे ता सम्हाल सीभी जानी री ऐ जानी ऐ ॥ १

केरु जे बचार तबे उठू तौ बै तोपदा संसारै रा ता तू है बोला एक कारदार सा ।
 कुंजी सा सचाई भूरी प्यारै रा बृहार तेरी, होछा बड़ो खरा खोटा तौबै एक सार सा ।

उहू तबै भूरदा संसारै भूरू एतरा जै प्यार सरी पोले फीरें मेरी सची भूरी ऐ ।
 मानदारी मान केरू सींभी होछै बड़ राता रौहै लौजें ज्ञानी ध्यानी ओबरी न तूरी ऐ ।
 जबै जाणकारैं तेरै प्यारै रा प्रभाव जाणू, केरी मूंडी दूबली थी बड़ बड़ ध्यानीऐ ।
 तो बाभी रौह मन रात घ्याड़ भटकदा अबै ता सम्हाल सींभी जानी री ऐ जानी ऐ ॥ ३
 भूरी केरी दुनिया री एतरी जै पापी ता पराधी लोक सरी फिरे पाणी न बी पातलै ।
 लोक जुण जुलमा बं केरदे पतारी दै ता माण्डू जुण रूखं थी नरौठे ता कजातलै ।
 केरी परमेसरैं बी अंठी दया आसा पांध भालू जौसा धीरें तैं बी बणी गेऐ आसा साही ।
 मीटी आसैं हौखी तौखी हुई रात घड़ा घड़ी, रौहा सा धियाड़े आसै हौखी जै घुआड़ी डाही ।
 हाऊ आसैं पता जाणे अंठें घोलै मोलै मौंभें कुण जेह जतन सो अकली बगानीऐ ।
 तो बाभी रौह मन सदा है भटकदा अबै ता सम्हाल सींभी जानी री ऐ जानी ऐ ॥ ३
 कुण जेहा भेष तौबे गौमी जाला पता नई रौहू एसै गलै हाऊं भीकड़ बदलदा ।
 कबैं जौहै एजीऐ तू हौथ मेरा ढोकी लैला एसै गलै रौहू रोज निदरा न टलदा ।
 कुण जेही तान तेरै मना मौंभें बेशी जांदी, गाऐ राग बारी बारी आसै सींभी जाती रैं ।
 कोई समैं रोंदेआ ता हौसदेआ कोई समै, फूल ढाबें पूजणे नै तौबें सींभी भांती रैं ।
 कौस जेही खेला न तू मीली जाला खलीदा, सो खेल कोई दसीं नोली पंडतें गियानीऐ ।
 तो बाभी रौह मन सदा है भटकदा अबै ता सम्हाल सींभी जानी री ऐ जानी ऐ ॥ ४
 रोज रोज राती हुई रोज ते भियाऐ केरी, हौखी केरी मीट पर नीज कदी आई नी ।
 भौरू आसै डेहरू बी आपणे है मना मौंभें, पर तैं ठाकरें ता पाई कदी केरा नी ।
 पाई जाच रात घ्याड़ आसै तौभे शाधणे नै, रौहा थी निहालदे नुहार पर हेरी नी ।
 जीण रौहै जीदैं पर जिदगी न कौखै जेहै रौही कुण कसरसौ नोली पछियाणीऐ ।
 तो बाभी रौह मन सदा है भटकदा अबै ता सम्हाल सींभी जानी री ऐ जानी ऐ ॥ ५
 रौहै आसै तोपदैं ता थोध किछ लागी नीछा, कौखै तो बभिए रा असल ठकाणा सा ।
 पूछैं जबै जाणकार बोलू एकी संत लोकें, हौआ सा जरूर पर करड़ा पराणा सा ।
 बोलू जोगी लोकें बोला बेश जप जोग कर, भोगी लोकें बोलू यारा भोगा न आनंद सा ।
 तबै मनी रामे बोलू मत होरी जगा तोपै, सो ता तेरी आपणी है आतमा न बंद सा ।
 तोपू जबै आतमा ता भालू तौखै गोभुआ दा, बेठा रोंदा बेवश ता दूणू नी जभानीऐ ।
 तो बाभी रौह मन रात घ्याड़ भटकदा अबै ता सम्हाल सींभी जानी री ऐ जानी ऐ ॥ ६

मुक्त कविरी भाभ-२०

बुझा सा गीता गौठणी अंढी जैं, पेशदी लोकें रैं मनान डूधी ।

हिकड़ जिकदा शुणनू आला बी, जने जैं तेई री कौकड़ी छूंधी ॥

भाभ ता दाह फियाड़दी लोभी री, मने री लोड़ी थी बेदण चुंधी ।

किछ ता होली ऐ लोली बी सौंगड़ी, बोहू सा आपणी अकल छूंधी ॥

घोशा सा शौधा ता कोमदी जौधा, बाचदी घेरै पराचदी खूंधी ॥

आपणी कथा २१

होछी जेही बरशोह सा मेरी जोमणे नोरली कथ,

चीं चरिकड़ केरदी सीकी जंढा गनाजी रा रथ ।

जौमण-मौरण २२

कीबैं लागी तेरी भौरीदी होखी कफण जबै ताणू ।

गौल भौरिए दुसकं कीबैं फेर चफिरदें माण्हूं ।

मौरना बुरा न जोमणा बडा दूहै गला नमूली ।

एकी धीरें ता उडू धियाड़ा होरतें सीरू भियाणू ॥

सुख - दुख २३

खुशी कीबैं आसै सुखा न हुऐ, मौथा दुखा न भाडू ।

की चीज थी माण्हू रा जीणा ता कंढा आसै फियाडू ।

जीउण आसरा स्वांग तमासा आप आपणी खेला ।

एका नीचीऐ भीतरै फिरै होरें एजिए नुआडू ॥

लोभी री आद २४

होछी भौरई मनी है नीछी आसै छूढी पतियाई ।

एक पाखली जेही दुआसी तुसै कबैं जैं पजाई ।

छूढे जतन केरिए थकू तुसा वो विसरी देंदा ।

टैंहकी जोथी न दसमी शाड़ा मेलणी आद आई पैं आई ॥

दाह २५

दाही रें ना न बिदरा डोरदी दाह सीभी री बूरी ।

आसा बेवशी रा जीणा अठा दाही बाभी नो पूरी ।

दाह माण्हू ए रें बांडे न पोई री आसे दाही रें बांडे ।

चाहो होऐ सो पोडे री दुखैरी, चाहो मनेने री भूरी ।

मने री बेदण २६

फीफरी पोखणी फुकुई दौवें न तेबड़ी भी आथी मखाला ।

जेवड़ी दाह सा जोसरे मना न तेबड़ी उथड़ी छाला ।।

तेहरवां महिना

फागणा शबातरी री पोरले सराजा घूम,
घोर घोर होछे बडे एसा बेनिहासदे ।

सिभ लोक लोभो चाओ केरदे समान सट,
घोड तेल नाज पोथा पीशदेता चानदे ।

रोत रात गांदे कांसी ढोलकू बजांदे गांदे,
नोचदे नरेली बीड़ी सिगरिटा मारद ।

चाणदे पकैम रोट के बहू रें महादेव ।

पूजा भोग लाये ध्याने जागरै रें बालद ।
मण्डी लागी जातरा न आऐ बोहू देवी देऊ ।

अलेगै रें तमाओ आऐ बोहू लोक भालदे ॥३॥

तूसा घटी जानू कंठ जीघा लागी शोलदी ।

जेतरें तमाओ होदें तेतरी है जोलदी ।

दौलतू छोकरे ठाकरी दुआली, हरजा देणे ने रीण कीह तेई छेकणे ने
 दौलतू जंगला न ता ठाकरी घोरा खटदे जुंडुए । दौलतू री चीठी
 ठाकरीए मूं आगे वाचणे ने आणी ता म्हीने रे म्हीने एक टपा
 जुआप वी लखाए केरु ।

दौलतू री चीठी, ठाकरी वै लिखू थी

राम-राम ठाकरीए राजी लोड़ी मेरी जोड़ी जंगला न हाऊ सीभी संधी सुघ राजी सा
 चीठी नाली लिखूई मपोह गोऊ बे वश, तूसे लाऊ बुभणा जे कि चकी तराजी सा ।
 तूसे सी गराहुं जी लखाए केरा म्हीने-म्हीने जोस गले आद ता नुहार रोहा ताजी सा ।
 देश गोड पाखला ता कोमबी करारा पर बुभदा नो किछ हाऊ तंढा मार गाजी सा ।

ठारा करहु रा राजा मूंडा पांघी रगनाजी सा ॥

जेबे आद घोरे री सा हाका पाइये बोलदी तबे सई सोठदेआ छाती लागी जोलदी ॥१॥

ठाकरीए लखाऊ जुआप

सूही मेरे बभिया जी उंवरे रे संधिआ ओज आई चीठी हाऊं कदकी बिहालदी ।
 घोरा हाऊ राजी बाजी टांटी टोर तोती ताजी छेता खोल्हा खटदी ता गोहू भेडा पालदी ।
 दाहुई की दुःखी मई नांगी शोखी भुखी नई माड़ें मनें कदी कोसी मरघा नी भालदी ।
 एक दाह कढी जेही हांघरें न निकलिए कोई समै लागी मेरे कोकडू वैं जालदी ॥

रोहा ता सा मनीरामा ठगदी ता टालदी ॥

पर जबें सघणी वियाहू सोब चोलदी, तेई मोके सोठदेआ छाती लागी जोलदी ॥२॥

चौइतर म्हीना नोवां संवत शणाऊ लागी जातरा चचोली टक रेही नाती मेलीदे ।
 चेच ता तुआर वासु नागैरी जबाडी आनी ठिरशु ता विरशु वशाखा देऊ खेल्हीदे ।
 चौलो लोका लोकणी बी बणी ठणी शोकणी खोडा खोड़ी होसदे ता थोसीदे भरेलीदे ।
 भांता भांती होंदी हाटी देउ खेला जाचा नाटी खांदे पीदे नोचदे ता डीसीदे मडेलहीदे ।

अंठे ताल मेरे बोली कण्के नी भेली दे ॥

जबे लागी साज बेजी नोडें रोटी तोलदी, तेई मोके सोठदेआ छाती लागी जोलदी ॥३॥

सागा घनेजेठ शादी सिरदै रा काहिका ता सौज वणजार वाली लोरजी री जातरा ।
 मोरली सराजा कुलू लागे अंदे बाजो जंठी पोरली सराजा होर मण्डी री शबरातरा ।
 नाती साती मेल, देऊ देवते री खेल पूछ जाचो रे तमासो पाहुण घामकी री खातरा ।
 मेरी जाच घोराली जो वृणने ता मोडणे नै पलमे रा पोहरा सधे वासती री वातरा ।

रात रात रोंदीऐ मैं शोगे केरु साथरा ॥

लोका जादे जाचा हाऊ जादी जोमी होलदी, तेई मोके सोठदेआ छाती लागी जोलदी ॥४॥

शादा जाचा भूईण टकोली सोरा नाउली न शोहर पछोवा हाजी न्याह नीछेकू आणीऐ ।
 वासती थी नीडणी घुमाला रोह होलने नै रोपेता रियाटे रोहै शुर्क बाकी पाणीये ।
 केरनी थी रुहणी जुझारे लोड़ी बाटा मजदूरी सधे भीत तोपु शादें सौतु खाणीये ।
 भेड़ सूजी सोभी मूर्ख दूआ देदी गाई शूकी गुरे बोला चेदू केरु जामकी जठाणिऐ ।

राजकी गराही एदा शाहूकार जाण्हीऐ ।

बशंग केरा सटी हाऊ कोसी न नी डोरदी रीणा आली भीखा लाये छाती लागी जोलदी ॥५॥

शाउणा वसांत छूटा गाश ध्याइरात पोऊ चोड़ा बडे छापरे रं पोट थी दुआडरं ।
 नाला आऊ होठ ठेका ल्होसणे रा बोह सधे मू डी-मूडी घाह हुआ छोली घाना जौंदरं ।
 खूठा हुआ चीकड़ ता पके बोणा पकड़ ऐ नौवी तोड़ा आली ठेपे गोरु मेड़ा हांवरें ।
 म्होखी रा मखोण पीशु मांगणे रा फोण हुए सेदा लाये सीन्हे सीभ साथरं ता मांदरें ।

साल खाणी शाही बाही सेउखाऐ बांदरें ॥

सापी जेगे नासपती टपा-टपो मोलदी बरोबादी मानदेआ छाती लागी जोलदी ॥६॥

शाउण टपाऊ साजा भादरू रा खाऊ सीधे मने देवी देऊ ता ठराई रौंडा डार्इणी ।
 तिहाई बी: केरू चोखा नाऊ होमापुछ पाई बोलु देवी अंबकें जं आगो ने नी दाहिणी ।
 लागी आऊ सरग बी रुड़दा ता चूड़दा बी पीऊ जोर कोमें रा टपाई जाचा शाउणी ।
 फौले रें बयारी लागे तोपदें घुआर माल लेखा स्हाव एंदा नी नपोड़ हांऊ दियाउणी ।
 लूणने बी घाह् हुए नीडणे ने माह साजा शौइरी रा फाह् कढ़े जानू हांऊ पाहुणी ।

शौइही रं गीड़ें दीड़े कोने हुई टाउणी ।

बैठी जे मशीना आगे केलही धाना दोलदी तेई मौकें सोठदेआ छाती लागी जौलदी ॥७॥

नौठा साजा शौइरी तुहार फौकी नौईरी धूपे पोए नटकदे दोहड़ पोहू ताड़ने ।
 हुए बेलहै देउली शरावा सुरा चाकटी न नशे पीछें घ्याड़ें ठउए चिधिए बगाड़ने ।
 बाभा सा शर्कीणे ने ता छौली हुइ चोड़ने ने दाहू डाहै चुंघिए ता खोड़ रोहै भाड़ने ।
 हाली जाणा सोहरा पोरें, दशमी ने देवी सीधे छेकें जे है चांदी छेता होसने ता भाड़ने ।
 एक रात म्हली घ्याड़ी दशमी न देवी आगे रोहै कला केन्दरा तमासा मीलू भासने ।

लोके लाए रात घ्याड़ होलिए नबाड़ने ॥

केलही लागी द्वासीदी ऐ कुछीबीनी फौलदी खाली फाढ़ें बेटड़ीरी छाती लागी जौलदी ॥८॥

दसमी टपाई काती धाने री लणार्इ कोठा छौली रा फड़ाकणा छलाठा रोहू लूणना ।
 चु घणे ने कोल्ह बाली लूणने बं माह रोहै बाथली रा धान रोहू मोड़णाता पूणना ।
 रोही काया राजी ता टपाऊ बूभा सड़ासड़ी कोमा रोहू णा लागी बोहू वेशणा ना लूणना ।
 लूसी बी सा लोड़ी बीणा काया रा धियानडाहू जानी पीछे करड़ा बी पौई जांदा लूणना ।

आमा दूही ताणे बाणे घूसत सा लूणना ॥

जबें लागी सुपने न जाड़ माड़ भालदी तबें सई भीखा लाये छाती लागी जौलदी ॥९॥

मोंधरा न बीभै तोयी सुढ़ छीड़ी ठावणे नी गाशा सीधे लागी जाणा हीऊं सारा पूणदे ।

गीठे केर खांदे पीदे कीलदे मसादे गादे कथा वाता लादे एका होरा चुप गुणदे ।

टुप टुपी छठिए ते साथरै न तूरी जादे गुण गुण केरदेया गला बाता दुणदे ।

खहें लोमी राती मसो चाछड़िदे काटी में ता ठालदेया चीणदेया भेड़दे ता बुणदे ।

तेई मोके अकल सारोया मू बैकुण दे ॥

मसो कसै चिणनी सो भीत लागी जौलदी तेई मोके सोठदेया छाती लागी जौलदी ॥१०

पोशा लागीदयाली लाई नेसरुए गाली जगे बाजे सीधे लाऐ लोक टपी चुड़ चुड़दे ।

बकी बाकी शोहरु एदे गीठे पाधे दुकी पीदे राती तीये दयाली न थी शौली प्याशे ठूरदे ।

छीपी छापी व्याली खायो गला बाता गुणी लाये होछे बडे लागे जगे साथरै न तूरदे ।

होसदे खलादे एका खीता खीती लादे कोई ठठे ठठे भीटीदे ता मनो - मनो भूरदे ।

कोकड़ी न मेरे लूण पिपली बरुरदे ॥

भालदेया कालजो न अंग लागी बौलदी, तेई मोके सोठदेया छाती लागी जौलदी ॥११

आऊ साबा माघ शेला खांदा जंठा बाघ हीऊ गाश बारी देंदा नी ऐ कोम कढे केरना ।

माह डाहै टालीये ता धान रोहू कूटणे नी खिचड़ी नी घीऊ लोड़ी चोपड़ कढेरना ।

साधू भाट हाली ग्वाले होरा कई जूबा आले कड़ाहू चीऊ पोथे आला लागी जाणा सेरना ।

ईना पीछे जाणे नी नी ओरें पोरे जूबा देदे देउली न मिसदा तमासा बी नी हैरना ।

तंठा लाऊ हीऊं गाश भला भलो पेरनो ॥

ठंड लागी दाही लाये बीघा लागी शौलदी काया लागी टडीदी ता छाती लागी जौलदी ॥१२

टपे गौतरी दसंत शिवरातरी नी रोहू अंत फागणे रे महीने बाचा फागणीरी खुलदी ।
 फूले पलम बदाम चेंरी शाई री बसंती सेरी होली लागी घीरा बोणा बुध लागी भुलदी ।
 बीजा गुड रे गडाकें गाशा शीस रे तडाके फूटें छूछरु कनिफडू वनकशा बी फूलदी ।
 लाल घीशी लायें पेटें सेरी न बदाहुली बराल होखी घाली बोदी भगो टुल टुलदी ।
 आपू नोठें भूडी होली मोउजा न छूडी इसी हाऊं सूढा छीडी पीछें बूढी हुई रुलदी ।

केल्ही हाऊ हाती सैधी बंजरा वसूलदी ।

हुई जवे बेवस ता हीका हीया मोलदी तेई मोके सोठदेया छाती लागी जोलदी ।





भरियालै री बधाई



बधाई सीभी लोको हिमाचलओ मदानो भाईओ,
मनी आसो जाच ओज एं दे भरियाली री ।
जूणा लोक पूजो ईसी धामें रे गदोडुऐ दे,
तीना होणी रीश आशा हिमाचला आली री ।

बिहार सा बंगाल मध्य-उत्तर प्रदेश हरियाणा,
राजस्थान पंजाब पटियाली री ।
गरमी सा गाल तीना लाक आली लोका तीये,
आहा घोटो दे दी लूऽ धामें रे बुझाली री । १

देश म्हारा अंठा जोखो छोहे सीता होंदी आर्क,
गरम सा बोहू जाँ लाका हिन्दुस्ताने रा ।
एसे गली गरमी प्रधान देश गोणिया सा,
गरमी रा स्वागत रु आज सा जमाने रा ।
धाम जे नूँ होऐ बरसात बी नी होणी तने,
बाझी बरसातीऐ नी ना रोहणा धामें रा ।
एसी गली गरमी रा स्वागत सा बार बार,
एंदी जांदी रोहा सा ऐ नीम भगवाने रा ॥ २

आसो यारे हिउं दे री नाम जाचा मने केरी,
मूँ डी मूँ डी हीउ म्हारी मूँ डी पांघो बेशा सा ।
कई कई घ्याड़ें दोर घावड़ने बी कठणता,
धूपी रा तशाण नई जाऽ कोस देशा सा ।

माण्डू बैठे केर गोख मेड़ा खूड़ा हूँ ऐ दे,

हीऊं काटी काटीऐ ता माण्डू घीरा पेसा सा ।

झंडी जूनी की बा सौंघे काटिया सा हिउं दता,

तने की निहाल आसा तेईरी हमेशा सा ॥ ३

सीब रोता ठबे ठगे सोड़ी एं दी जांदी रोही,

एसी गले सदा रोहा सभा की सदासा सा ।

खूँ, चूँ, वासत भयलि सोड़ी छोणे केरु,

चूँदी वसति सोड़ी काती बपियासा सा ।

हीऊं गाथा पोशा मोघा जोड़ी सदा साल आऊ,

जोस गले बरतिया बाबरा नुमासा सा ।

आपणा नी जोरा किछ माण्डू गोऐ वैवश,

जंदा डाहै मासक ऐ लंदा रोहणू आसा सा ।



दाह २५

दाही रें नां न बिदरा डोरदी दाह सीभी री बूरी ।

आसा बेवशें रा जीण सा अंडा दाही बाभी नी पूरी ।

दाह माण्हें रें बांडे न पौई री आसं दाही रें बांडे ।

चाहो होऐ सौ पींडे री दुखे री, चाहो मनने री भूरी ॥

मनै री बेदण २६

फीफरी पांखणी फुकुई दीवें न कोम नी आथी सखाला ।

जेवड़ी दाह सा जोसरें मना न तेबड़ी उथड़ी छाला ॥

बजोगणी री चीठो लाडै बै २७

होर हाऊं राजी बाजा खांदी पींदी पोलदी ।

कोई मौकें सोठदेआ छाती लागी जोलदी ॥

सूही मेरे बभिया जी उंबरें रें संधिया, ओज आई चिठी हाऊं कदकी निहालदी ।

घोरा हाऊं राजी बाजी टांटी टोर तौती ताजी छेत खौला खटदी ता गोरु, भेड़ा पालदी ।

दाहुई को दुखी नई नांगी शोखी भूखी नई माड़े मनै कदी कौसी मरधा नी भालदी ।

एक दाह कढी जेही हांदर न निकलिये कोई समें लागी मेरे कोकडू बै जालदी ॥

रौहा तो सा मनी रामा ठगदी ता टालदी ॥

पर जबै संधणी वियाहू सौघ चीलदी ।

तेई मौकें सोठदेआ छाती लागी जोलदी ॥ १

हीउंद धियाड़ा जबै गाश पाणी शेला पाला हीवें रा फरुहरू कदी पूणे लागे पूणदें ।

गेठे फेर पींदें खांदे कीतदें मसादें गांदें गला बाता लांदें एका होरा चुष शूणदें ।

टुपा टुपी उठदें ता साथरें न पेशी जांदें गला बाता केरदें ता दुख सुख दूणदें ।

खहें लौमी राती मसो चाछड़ी दें काटी में ता ढालदेआ चीणदेआ भेड़दें ता बूणदें ॥

तेई मौकें अकल सरीखा मूं बै कूण दे ॥

मसो कसो चीणनी सौ भीत लागी ढोलदी ।

तेई मौकें सोठदेआ छाती लागी जोलदी ॥ २

पोशा लागी छाली लाई नेसरहे गाली जब बाजें सँघे लाए लोकें टपे चुड़ चुड़दे ।
 बकी बाकी शोरु एंदे गेठ पांघ, छीपी लेदे औधी राती बाहींए थी शौली प्याशें तूरदे ।
 शेलें बौंदा जीकदे ते औगी भेटी सीकदे खेल्हुई पटी किए थी शेलें दूँह लूरदे ।
 छीपे छापे ब्याली खाई गला बाता शूणी लाई होछें मोटे लागे जब साथरें न तूरदे ।
 होसदें खलांदें बी एका खीता खीती खांदे कोई ठठे-ठठे भौटीदे ता मने मने भूरुदें ।
 कौकड़ न मेरे लूण पिपली बरूरदे ॥

भालदी रें कालंजें न ओग लागी बौलदी ।

तेई मौकें सोठदेआ छाती लागी जौलदी ॥ ३

टपे गौतर बसंत ठाकू शैला बेटी खंत किछ भ्याई लागे खुल्हदे ता धारा लागी खुलदी ।
 देश फीर लाल शैला शार्दर बसंती छेना छीटा साही रौंगुआ ता बुध लागी भुलदी ।
 बीजा गूड रें गड़ाकें गावा शौर रें तडाकें फूटें छूछर कनिफड बनकशा बी फूलदी ।
 लाल घीरौ लायौ पेठें सेरी न बदाहुलौ बराल होखी आली बीदी भगी टुल टुलदी ।
 बौणान वरम फूलें किकर खनोर खिलें पीउली पठाज्जाली बागर जें भुनदी ।
 आपू नीठें भूड़ी होलौ मौउजान हूदी इसै हाऊछीड़ी मूदी पीछें बूदी हुई सलदी ॥
 केलही हाऊ हाली सँघे वासती वसूलदी ॥

हुई तबौ बेवश ता हीका होथा मौलदी ।

तेई मौकें सोठदेआ छाती लागी जौलदी ॥ ४

सौंधी लागी होली फागा फागली रा समा लागी जाचान चचौली टकरेडी नाती मेलीदे ।
 कुलू लागी विरगु सराजा पोरें ठिरगु निरगु निर्मडता जबड़ी देऊ खेल्हिदे ।
 चौलौ लोका लोकणी ते बणी ठणी शौकणी खीडा खीड़ी होसदें ता थोसीदे भरेलीदे ।
 भांतो लागी हाटी देउखेला जाचा नाटी पींदे खांदे नौचदे ता ढीसीदे मडेलहीदे ॥
 अंदे ताल माल मेरे कभवी नी भेलीदे ॥

ईना ताला भालदेआ होखी लगी शौलदी ।

तेई मौकें सोठदेआ छाती लागी जौलदी ॥ ५

निहारी रातीऐ

कालटी रातीऐ तेरी कमाई ।

“तेरै चलितरा भालदे मांदिऐ, रात नी सूता ता हीख नी लाई”

खसमा साम्हण राणी नरोलं, रो, कदी नी कोसीन शकल रिहाई ।

सूरज व्याहूऐ जोतड़ टपू, मंतरै मंतरें प्रगटी आई ॥ १

केरु निहारा तें चौंउ कनारे न, प्याशा बखाइआ पीछें सकाई ।

आऊजां देउर चंदर मामा, फीरी पियाशी ता खिड़ खड़ाई ॥ २

सन्हका मारदें तारें नगौणे, एकें ता ऊजें न छालहा बी लाई ।

चंदरा भालीऐ कोई पतारुऐ, एका ता बुझणा घोर जुआई ॥ ३

धीरी ता होऐ तू एणे दे व्याहू, नई जै तेरी में चुगली पाई ।

आपणी खाखीऐ बाणली सची, चाहो तू कसमा केतरी खाई ॥ ४

चंदे रें गोरें गलोटन कालख, काजल तेरा सा पक्की गुआही ।

सुखों रा तौयें निहाली थी लोको, लींढा ता चोर री साल पकाई ॥ ५

भुं बड़ू बाटीऐ ठूरी ककटी, तेरीहै नदरी ढोकणी लाई ।

डिमकी नोली ते रामशौरें, पीछें न ठूरदें उंबर खाई ॥ ६

जेतरें नाढ़ ते बालान तेरें, चोरा बै मौउजा साधः बै फाही ।

घाचुऐ तेरें सी ऊंबलें काउड़ें, ऊलू शियाली ता घाही ता शाही ॥ ७

हुआ जै लाड़ें रें एणे रा बीगत ठंडुई तेतरी सकपकाई ।

गोभुऐ लींढ पतारुआं देउर, आपू बी फिरदी फुलदी शाई ॥ ८

मरघी केरी भियणू चमाकिए, कालटी रौंड दुआलिए पाई ।

रौंदें पकारेदे सीभोऐः तूसै हीसू रें ठीपूऐ जीमी शगाई ॥ ९

लुच्चीऐ तौनै बी टकरु लुचा, जडें नै तंडा ता भाटा नै नाई ।

खोउ तमाशा बेवशीरा सूरजें घाउड़ी खेला न रात भियाई ॥ १०

बजोगी री दुआसी—२६

कांगड़ धीरला एक अध्यापक छोकरा छुटी काटीए आऊ ता पोरलें सराजा नोकरी पांघे जांदेआ जलोड़ो जोता न दुआसुआ, रोंदा बेठा, हिकटुईए रोंदा रोंदा दुबला पौउदा थी ता तीसैं हाऊं बी चौलूदा थी, तेईरी दशा भालिए छौडी बी नोलू ता पुछिए दसी बी नीछा, मसैं कसै गढेरू, तेई री गल रा सार मैं बोता होइदेआ अगलै इना टपैं न गौठ ।

-पीडा सा ओखे सुआस नी आथी-

पुछदे माता जी विथा बै आसरी, चिंधिए आसैं दुआस नी आथी ।

लागत हौंडदें म्हारी की तौड़ी री कोसीरी आसा तलाश नी आथी ॥ १

कूगी ब शौउरु आथी नी सुख री, कोसा बै भूरी री आश नी आथी ।

कोसरी भाभा नी सरगा छुंघदी, आशक तबै निराश नी आथी ॥ २

मन दुआसुआ बोता न हौंडदें, दुआसी री केरी तलाश नी आथी ।

रौह पलेटुई उथड़ें चांधा न ऐगे रा पूरा वशाश नी आथी ॥ ३

लोहू शकौड ता हाड़कैं निकतैं, पीड़ न तिनका मास नी आथी ।

धीशदें केतरी रौशी न बाडुई खूहै रं पाथरा घाश नी आथी ॥ ४

डगुऐ बांकी नुहारा बै भालीए कागदी फूला न बास नी आथी ।

खडी शचाणी सा मनै री बेदण, पौधरा हुरला आस नी आथी ॥ ५

केतरा भेलला फूलै रा माणस, खौरशू बोन बरास नी आथी ।

हुआ परेमी की जोसरैं टैंडै न, लूणके पाणी रा गाश नी आथी ॥ ६

मनै रै घोटा छनेरने तैं इएं, होखी न पोरै नकास नी आथी ।

भूरी री दाही न तीछी ता डूधी, पडवा नौई वियाशनी आथी ॥ ७

माण्हू सी मौरा ता लोभी सी जौलदा, लोभा ता भूरी रा नाशनी आथी ।

गौई गशीटदा पीछैं बै कौकड़, सच सा बेवस ऐ हास नी आथी ॥ ८

चतर मसैरी राती-३०

भादर महीने री रात निहारखी कड़कदी बरसाती ।
 हांडे परदेशिया काटणी कंठ तेरे बजोगे री राती ॥
 सरगा शुकिए चंदर भाड़ुआ पूनू बी फीरु निहारा ।
 शौउंकी माण्हू री भाभा बी शुकदी लोभणी लांदी पकारा ।
 बाहरै लागीरै शुकदं याजीऐ छेत बगोच ता बीणा ।
 लोभी बजोगी रै कौकड़ू शुकदं गोरु रै शुकदं थोणा ।
 कांया ता कूजै रै कौंडे न बिन्हुई दोहरी बिन्हुई छाती ।
 गाशे रै टीपू बी चुभदं लागे तेरे बजोगे री राती ॥ १
 बिदलू चीलदा रुशिए जबै जे भौरदं लागणा सींधी ।
 काजल धोईदा होखू रै पाणिए पौरसू पीड़ीऐ बींदी ।
 जाइरु पाणी न भोहई जोका चीलै पतारुई लोका ।
 मीटुई होखीऐ उठी बजोगण भाली ना शूणिए पींदी ।
 होर का होर ऐ फीरु संसार ता बुध ठकाणे नी आथी ।
 ओग बजोगे री सौहुईनी छीड़ं तेरे बजोगे री राती ॥ २
 बामौ री चीरुई कुरती बांही र टीरदं कांगणू चूड़ी ।
 दोथकी बागर लहशकै लांदी बादला छिड़ंगा चूड़ी ।
 काया रं बाजदं हाड़कं पीडं न तिनका मास नी रौहू ।
 पीडं ना पीउंली त्रापड़ी रौही ता पाणी न पातला लौहू ।
 रौहू बशाह नी आपणी काया रा चुप सीमितर नाती ।
 भोंगट घीटी बजोगण काया तेरे बजोगे री राती ॥ ३
 देबतौ राकसा फीरी मनांदीता दुनिया भालिए हौंसी ।
 पीडं री चौई बै सावण मौलू ऐ धोउई नीछी दुआसी ।
 बरत केरिए तीरथ हेरै छिदरं छोदं ता पीपली भासी ।
 हीशी है नीछे जतन केरिए मनान ओग जै बौसी ।

टेपले बणिए खुलदा कौकडु शौगं गलोटे ता छाती,
 भीतरै बाहिए पाणी रा ओछड़ा तेरे बजोगे री राती ॥ ४
 बीभीदा सरग शुकदी हौखी उड़दें भालीदें भाजा ।
 भांभी दी धुई री भीतरै बाहरै फिरदा जीउड़ ताजा ।
 लोभी ता शौउकी लोका निहालदें एजदा शोइरी साजा ।
 रोगी बजोगी ता जोलदें खुलदें ढाबदें घाहा ता नाजा ।
 कीजी बै केल्ही बै विजया दशमी कीजी बै शौउज कार्ती ।
 रौही वेवश निहालदी जोलदी तेरे बोजोगे री राती ॥ ५

नुअरै ताल — ३१

ईना ताला भालदेआ हौखी लागी थकदी ॥

एकी ध्याड़ें भालू जोथ रुशी नौठी चंद्रमे न ।
 बेठी जायै दूर जंढी उड़ी नौठी फुकरै ।
 एकी ध्याड़ें शूणू फूल ओलू जबै धोरती ता,
 पाथरें रें कालजें रें हुऐ शौउ टुकरै ।
 एकी ध्याड़ें हौखू लागै हौखी पतियां दे आसै,
 हंदै जांदै रौहाम तू मत शुक्कें फिकरै ।
 एकी ध्याड़ें फिकरिए बोलू लूपी भाहिड़ीऐ,
 छंधणे दे एकी घेरै तबै केरी नखरै ।
 अंढी अणहोणी गला हुई जंढी सुपने री,
 फिकरी थी चाछड़ी दी लूपी थी पटीकदी ।
 ईना ताला भालदेआं हौखी लागी थकदी ॥ १

एकी ध्याड़ें कौली लागी भौउरा बै बोलदी ज,
 तेरें ओठ जूठे सी तू हेरी मूं बै छूंधदा ।
 बोलू तगै भौउरें तू मत केरै चांडा अगै,
 तू है छूंध मूं बै हाउं नई तौ बै सींधदा ।

अंठे ठठे मसखरी गला बाता लागरी थी

धूणू पीछे धीरे कोई मसखरा खंघदा ।

तबे कोली भांबड़िए ठोकुई थी भोउरा न

बोलू भाल कुण आऊ होला मू वं चुं बदा ।

एई तहें मेल ता थी हुआ पर डोरा लाये

मने मन होसदी ता जाहरा न भीकी दी ॥

ईना ताला भालदेआ होखी लागी थकदी ॥ ३

एकी ध्याड़े जिदगी र तड़कदे धूपे पाधे

मिले दूई चीड़ू खुल्ले सरगा न उड़दे ।

दूणुए ना दूनुए नाकिछ केड छाड़ हुई

होई गोउ प्यार चार नैन जबे जुड़दे ।

लागे जां दुणदे ता होणी रौंड होसी पीई

बागर बियाना फिर गाशे हुऐ चुड़दे ।

छुटी गोऐ होथ जुण चौबे मुलाकाती बं थी

आंगी आंगी लागे दूहे बागरी न रुढ़दे ॥

एई तहें काटुई थी रात सौ बजोगा मौंभे आद रोही धुखदी ता भूरी रोही घुटदी

ईना ताला भालदेआ होखी लागी थकदी ॥ ३

एकी ध्याड़े आऊ एक थकीरा मसाफर

वशावां दूई घड़ी एक घुटु पीऊ पाणी रा ।

चैकू तने बुजका ता टुल टुली भालदेआ

चोलू पर जंढा तेये रसता नी जाणीरा

बेईरी नुहार किछ अंढी बेठी मना मौंभे

जंढा कोई माणू हौऐ भूरी पछियाणी रा ।

घोड़े केरी मूरत मशेल केरी मनो मन

जोस गले चिन्ह रोहें तेई री नशाणी रा ।

अंढा मन बेउरा ता बुध गोई काची जुण एंद सौवै एजदी ता जांबै सौघे सिकदी

ईना ताता भालदेआ होखी लागी थकदी ॥ ४

एकी छ्याड़े घुलदेआ मल्ह पोउ थाल्है तेयी

बोलू जें ता एक पाली देंदा मूबें होरतू ।

तबें तोवी दसदा तमासा बाजी मागिए ता

पीठ देंदा लाई लांदा केतरा है जीअ तू ।

जा यारा छोड़ अंढा बोलू जील होंदें मल्है

एज दूजी घेरें भी ता बणाई देणा मोरतू ।

घूलें दूजी घेरें तबें पासा पोउ उलटा ता

बोलू तेयी केर अबें बचणे रा धोर तू ।

एई तहूँ बिगड़ी सो खेल्ह जीती होंदी बाजी

मल्ह पछ्त इंदा ता बिदरा थी होसदी

ईना ताला भालदेआ होखी लागी थकदी ॥ ५

एकी छ्य डें सरगा न तारा पोउ चूटिए ता

एकी खीलों कोल्है फाढ़ें मोभं सो गभेई डाहू ।

बोलू ऐकी चीड़ुऐ बरादरी न छुड़कीरा

कीने एई बिटलें ने बास यारा देई डाहू ।

कोल्है बोलू दुखी भेंघें दुखी ने पियार होंदा

बिछड़ी रे डाने साही आपू आगे सेई डाहू ।

फूला ने ता आपरा सीसिभ लोक होथो होथ

चूड़ू जुण होखू माटें फाढ़ें न सो लेई डाहू ।

अढे ईना चूटें छूटें बिछड़ें जुआड़ुए री

वीथा तीना बेवरी री कलम नी लिखदी

ईना ताला भाबदेआ होखी लागी थकदी ॥ ६

वेउरा—३२

माण्हू रें हलै न होरी बें तोपद आपू है हया सा केतरी घेर
 होला बी नई की घोरनी पांघें ऐ थोघ नी लागदा देउआ मेर ॥
 बूझा थी आपू बें लिखदा चिठी ता पुछनू कोसा न आपणा पता ।
 दसदा कौसकी कौखी सा हाऊं सो छूडान मूं बें जें तोपदा बोता ।
 नां ता भटकी भूली रा हाऊं ता शौलंदी मेरी नी हौडदे लौता ।
 तबै बी हल्ले न ढाबीदा कभकं छूडा न आंगी बी बुझिया साता ।
 आपणी जौघें घरेसुआ गारा आपणी जानी रा आपू है मेरे ।
 माण्हू रें हल्ले न होरी बें तोपदे आपू है हया सा केतरी घेरें ॥ १

यारी न भेरी मैं आपणे ओप रें आपणी जानी रा बी बैरी ।
 भूह बी आपू बें हाऊं न मुकता सिभ मसीबता संघणी केरी ।
 आहंकी होसी बें होसदे होसदे रण बोता न जान खपेरी ।
 छूंडा न होला की नई बी होला हादुई होखी बी होसबी फेरी ।
 चौलदा हाऊं ता तेई ठकाणे न जौखी जें लोक रें बेशदे डेरे ।
 माण्हू रें हलै न होरी बी तोपदेउ आपू है हया सा केतरी घेरें ॥ २

रूप नुहार ता रंगे री गल की आतमे सरी सा बदला समा ।
 अबै ता एतरा सरी नो फयाड़ीदा हीका न मन की पाथर जमा ।
 पता नी चिन्हनु नई की आपू बी बिछड़े हुआ सा बौगत लोमा ।
 आपणे आपाने निपट आंगी सा पाखला जंढा जे तुमा ता हमा ।
 बुझू थी जौखी जे पुजें ठकाणे ता निक तौ तौखे बी जिऊ पै फेरें ।
 माण्हू रें हल्ले न होरी बें तोपदे आपू है हया सा केतरी घेरें ॥ ३

मनाल करड़ी—३३

हीउंदा निहालदे बी होऊंरें पुआसैं जीउ
भीउं चीली बीणे ता मनाल होर करड़ी ।
होऊं रें हिमाचले रें जीऊ आसैं जीण म्हारा
हीऊं लोड़ी बोहू सारा आसा नै मकरड़ी ।
आऊ जने उजें न कबल्ला हीऊं बूटी बूटी
तने लागे सोठदे जे गल हुई करड़ी ।
खाइंदा ता माटा गटा रोहिंदा डुआरा मौंभै
एली जे हियाईणी ता देली आसा दरड़ी ॥ १

बोलदा मनाल लागे गुण जोड़ी करड़ी ऐ
चोलाम गराहुँजीरी सेरी पोरें चुगदे ।
जगा होली नांगी जी मेहं होले होरें राई
शई होली फुलदी मटर होलें उगदे ।
बोलू तबे करड़िए चुप वेशा संघी होरो
नीडल गरो सेरी आसा नै नी पुगदे ।
हेड़ी होले तुबकिए पाशी ता गलेसा ढापा
माण्हू होले छापीदे ता कुले होले घुघदे ॥ २

एक गोउ दुख तूसी हुऐ अंठे बांके चौउ
कुंठान नो जीउ ता परीउ अंढा शोभला ।
सिभ रग चटकदे चिलकदे थेबें साही
होखी पूंजे पीउंले ता डाल पूठा लोभला ।
मूंडा पांघे चोढ़ जंढी कलगी सा राजे आली
बुभिया सी जंढा कोई बादशाह रोभला ।

अंठे तूसे बाँके भोलें भालें सी पहाड़िऐ ता
जीने रें सी भादर सभाउ सा नथोघला ॥३॥

रूप रंग तूसरा जे मीली जांदा मूँने लोभ
बेटड़ी रा पूरीदा बचाऊ तूसा जानी रा ।
रूप ता शंगार सा पियारा पर पैहिलें ता
लाड़ा जुण मरध सुहाग सा जनानी रा ।
म्हारी जान जाए ता सुहाग लोड़ी राजी
चला आऊ वसुआस अंठा म्हारें हिन्दुस्तानी रा
केरी गङ्ग उलटी शंगार धीना मरधा नी
लागा की भलेखा सहाब खोवा भगवानी रा ॥ ४ ॥

ऐहें रूप रंग मेरा बीइरी सा संघणिए
एई पीछें जान मेरी शौघें पांघें री हासा ।
एई पीछें जोता पंथा उथड़ें नगाहरा न,
गोभीदेआ खार भार जूनी वीथ सौहा सा ।
जान माल आपणी गभरने बै रूपा पीछें
जंढा कसतूरी पीछें बीणा दुखी होआसा ।
माण्हू मतलबिया स काणा बीरी म्हारा, कल-
गीरें लोभा पीछें शान म्हाचलीरी खोआ सा ॥ ५ ॥

नाटी आली कलगी न देशी रें मनाल फीटें
टोपी कोटा पांघो मूँडी म्हारी हाली ग्वालें री ।
चोलें टोपे घाड़ड़ें वनारसी दपट्टे, बाभी
कलगिए दुतिमा बी रोंदी जोड़ी बाले री ।
हांऊं शोभा तूसरी हिमाचली रें भाई भीणो,
मुँने जे फटेरलें ऐ शौक सा दुआले री ।
वीण हुऐ बेशक कनून रोहै कागदा न
फीटी आई जात आसा बेवश मनालें री ॥ ६ ॥

देश पियार—३३

बेटड़ी मरधे रा कठा राग
देशा सेंधे प्यार, म्हारा देशा सेंधे प्यार ।
देशा सेंधे प्यार आसरा देशा सेंधे प्यार । १

बेटड़ी:— वीर बेटड़ी देशे री आसी
मरध:— आसी जोधो जवान
बेटड़ी:— दोसिए मरधा जुधा भेजदी
मरध:— आसी लड़ावे जान ॥ २

दूहै:— आपणी सा सरकार ॥ आसरा देशा सेंधे प्यार
मरध:— मोरदें मोरचें पांघो आसी कदी नी जाणी डोर
बेटड़ी:— खोल्ला छेता ता शोरू गोरू आसी सम्हालें घोर
दूहै:— ढोऊ देशे रा भार, आसरा देशा सेंधे प्यार ॥ ३

बेटड़ी:— जदी कोसिए हमला केरू ढोकी उबली बौत
मरध:— सूतें बार्थे रा लींघट ढोकू शाघो आपणी मौत
दोनों:— धीनी करड़ी मार आसरा देशा सेंधे प्यार ॥ ४

आसरा देशा सेंधे प्यार

आसै जागै—३५

दूहै:— जागै देशे रें मरध बेटड़ी, देशा स्वारदे लागै-हो
सभी देशा न आसरा मुख लोड़ी निकता आगै-हो
मरध:— उठा कीमा ने मरध गाजिअरी मता सोठदें कीछे
बेटड़ी:— एई देशे री बेटो सी आसी बी कीने रोहणा पीछे
दूहै:— सीभी मिलिए देशा सुआरना चीला नाटी रें रागै हो ॥ १

सभी देशा न आसरा मुख लोड़ी निकता आगै हो ॥

देश बनाणा—३६

उठा डे भाईयो घोर बनाणा ।

सोई नी रोहणा देश जगणा ॥

होरा जे मुसल जागै थी आघे पोढ़िए गुणिए निकतें आस ।
आरो गलामी न रोहै न भागै नीचणा पोड़ा थी लोकें रें रागें ॥

काल छटेरु सा देश पराणा, उठा डे भाईयो देश बनाणा ॥ १

शोठ करोड़ा सी बोलणू आसै, घोर सा जोजरा बोलणू खासै ।
घोर थी आसरा केली री नासै, लोकें बुझाड़िए केरीरा पासै ।

बेशका केरिए डाहू कराणा, उठा डे भाईयो देश बनाणा ॥ २

आसरे लीडर बड़े सताजा नौवों विधाने री नौवी रुआजा ।
सिभ सी परजा सभी है राजा राती दियाली सी घ्याड़ी सी साजा ॥

जादी रा गेहिला शगन पाणा, उठा डे भाईयो देश बनाणा ॥ ३

जेतेरे घरम जात बरादर सीभी रा एक बरोबर आदर ।

जात सा माणूता हक बराबर कोमा मताबक सभाहै भादर ॥

जुण सताज सा सी है सियाणा, उठा डे भाईयो देश बनाणा ॥ ४

पातला भूंगा कसोथै थी बोहू, कठा नुआड़ू थी लागणा लोहू ।

योजना केरीए बुटड़ू रोहू, बोरशा पौजै रा बोगत डाहू ॥

तेजा न एक कसोथा गुआणा, उठा डे भाईयो देश बनाणा ॥ ५

योजना बोलणो कोमै रा तर्हा, बाभी सकीमें नी खोइदा खर्हा ॥

ईना न जूंडीणा शोभली तर्हा, अंठा सा अकली आली रा सर्हा ॥

स्थावो नुआड़ना स्थावो टपाणा, उठा डे भाईयो देश बनाणा ॥ ६

कोम थी पैहि ले जूणा जरूरी, पैहिली दूजी तरीजीए पूरी ।

चौउथी पौजा बे लीडरा घूरै, इता सा देश री एबड़ी भूरी ॥

सरगा बूझा सी देश पजाणा, उठा डे भाईयो देश बनाणा ॥ ७

हिन्दुस्तानी सी शौठ करोड़ा, नाजा वियाभदें मुनुआ चोड़ा ।

घोरा थी सारी है चीज रा तोड़ा, सीउणी नाम थी लोका न लोड़ा ॥

लाऊ बेअंता समान बणाणा उठाई भाईओ देश बणाणा ॥ ८

चोऊ कनारें री सड़का हेरा, मोटरा बिजली चोउ चफेरा ।

पाणी रें नलकें दूध रें ढेरा, जीमी गरीबा न घोरें बें डेरा ॥

डाक मदरस ग्रा प्रमाणा, उठा ई भाईओ देश बणाणा ॥ ९

आपणी जीमी बें खूब पजेरा, बेजा ता खाद पजाड भतेरा ।

भाजी ता नाज बी फील बधेरा, रोजीए खाड ता ढव्वे कठेरा ।

केरा तजरबा नोआं पराणा, उठा ई भाईओ घोर बणाणा ॥ १०

शांति संतोषा बें ऐमरजंसी, गरीबा जियाणे बें सूतर बी: ।

अबें भी जागें ता दूबणा भी, एता न बघका बोलणा की ॥

सीभी बेवशें रा तहाँ वशाणा उठाई भाईओ देश बणाणा ॥ ११

आसै हिन्दुस्तानी — ३७

आसै भराऊ सी शौठा करोड़ा ।

हिन्दुस्तानी सी शौठ करोड़ा ॥

जांदे फरंगिए पाऊ खरोला, होसदें घोरा न पाउ बछोड़ा । १

बौडुए घोरा न खोली न ओड़ा, ओज सा टबर शौठ करोड़ा । २

म्हारा मलेगा सा मनें रा भोला, खटदा बोहू ता दूणदा थोड़ा । ३

आसै नी मारदें फोकी लपोड़ा, कोढिए शेटणा नाजें रा तोड़ा । ४

परिटी बाजी रा गिद गदोड़ा, एकी रा पोलड़ा होरी चोड़ा । ५

फीरदें घोरठा पोड़ला रोड़ा, छानीए शेटला होकें रा फोड़ा । ६

अणिए रोहात होबहू जोड़ा, बेवश वीरी रें हाडकू चोड़ा । ७

चीने रा हंबला—३८

उठा देशों रें बेटड़ी मरघ घोरा कुंभल लागा ।

सीम टबर होश्रा कटेई डें, मत भीरा बलागा ॥ १

घोर आसरा हिन्दुस्ताना, मस करो छटेरु ।

तीहा बोरशा भीतरें एतरा, सोथी साधिए केरु ॥ २

बेटी गाभरु भारत माता रें आसी शीठ करोड़ा ।

ह्याऊ केरिए बणात फौजजी, थोसा बैरी रा चोड़ा ॥ ३

टेंडा लाग़ा अब चीनीऐ चोरैरा, आसा लूटदें आए ।

चुप चुपे बडे जेत री भीती न, बोह कुंभल पाए ॥ ४

आसा ठाकणें पेशदें पेशदें, छेकं निकल आगे ।

बुरी मोड़तीऐ मोरना पोड़ला, जं ता अवी नी जागे ॥ ५

बडा बुरा सा चीने रा आदमी, माणू चापणू आला ।

कोई तेई रा दीन ना धरम, ईना तिबती भाला ॥ ६

मता भूरदें जेउर गहणे, मता ढबुआ घेला ।

रोणा पोड़ला हीकडू भीनीऐ, चीनी लूटीऐ नेला ॥ ७

लागे उठदें देशों रें लोका, चोलें भरती होंदें ।

कने पुजदें मोरने पांघी, खांद चीनी बो दींदें ॥ ८

बडे जोरिए, आसरें फौजजी, लाग़े धाकदें पीछे ।

केरा मजत पीछे न, तिनरी, जीऊं फिरले तीछे ॥ ९

छोडा बिदरो आचा जणितरी, साजे बेजे तुहारा ।

सारी मोड़जा छोडिऐ बेवशा, ईना चीनी दुहारा ॥ १०

पंचायती राज—३६

हा: कट पंचाइती राजा

सौभ पोडिऐ रोज दिआली दोधी उठिऐ साजा । हा कट ०

नई रोहै अब ठाकर राणे सऐ राजे री खेला ।

जूती निभारी सिंधी फरंगी री पाले बगारी रा भेला ॥ १

आसे सिभ सी परजा देशे री सिभ देशे रे राजे ।

पाले फिरदै सिभ परेखणे कुण गाजे ता बाजे ॥ २

एक जेहै ओज बेटड़ी मरध नई जातीऐ बडे ।

तेहै बडे जुण देशा गरां न होथ जोड़िऐ खडे ॥ ६

राम राजे रे गांधी रे सुपने ओज हुऐ ते पूरे ।

राज बणे अबै सभी गरां न जुण लोका नै भूरे ॥ ४

फाटी फाटी सरकार बणाइऐ हुआ देशे रा भला ।

तहा केरना आपणे लाके रा म्हा रे होथरी गला ॥ ५

होछ होछणू राज बणाइऐ सीभी लोके रे जीम ।

राज केरना दसणा सीभी नै एसो बांकी सकीने ॥ ६

ग्रावां फाटी री होछी पचाइती व्लाक समती बडी ।

जिला परिषद तीना न बडी बडी गला नै खडी ॥ ७

एकी राजा न एक असंबली केरी देशा न सारे ।

राजा भीतरं कनूना सुआरवी इतजामा नै म्हा रे ॥ ८

लोकसभा सरताज पचाइती दूहै पारलीमिटा ।

सारे देशे रा भला व चारुदी नई आसा नै चिता ॥ ९

एई ढंगे रा राज पंचाइती नेता लोके बणाऊ ।

अबै गल सा आसरं जीमे री ठोक लोड़ी चलाऊ ॥ १०

माण्हं छांटीए पंच बणाणे जे कुण रांभडा खोटा ।
 जात ब्रादरी आपण पोपण छोडी भोरनी बोटा ॥ ११
 जुणा बणे परधान ता पंचा केरें बिदरें प्यार ।
 घोखा केरलें बिदरा सौघ ते लोडी आगी बी हारें ॥ १२
 जीतें ना हारें चिघिऐ विजी बी फीरें प्याशं निहारें ।
 बंदो बसत देश केरदें आगे पिछले ज्वारें ॥ १३
 आद डाहणी तदकी रसम जुण कसमा खाई ।
 लाके मुलखी री लीइए लोडी मान दारी नभाई ॥ १४
 न्याऊ केरदी न्याय पंचाइती बाभो टिकटे फोसो ।
 पंच गांए रें जाणा सी मांबलें भूठ सच सा कीसो ॥ १५
 होछी खाखीए बोहू की दूणनू गौऊ माण्हं बेवशा ।
 कोम केरा अगे देशा बणाणे रा सोठा पिछली दशा ॥ १०

बेटडी पंचा—४०

राज पंचाइती लागा मांदीओ राज पंचाइती लागा ।
 देवा छोपदी डाबुई ओज कूलू घोरें री भागा ॥ १
 ओधी दुनिया बेटडी बोलणी ओधी मरघा लायें ।
 डाही बेटडी बाँचिए फिरलें कढे देशे रें भागा २
 नोबीं बणी सरकारा ओ मांदीओ नीवे बणे कनूना ।
 हुए हाकम बेटडी बाई के भाला म्हारें दमागा ॥ ३
 घोणी बाईके बेटडी मरघ सभ घरमा जाती ।
 एकी छाटे रें मणवो सिभता मौंभै मुलख धागा ॥ ४
 काया पलटी हिंदुसताने री फीरु निहारें रा प्याशा ।
 लोकं कुलू रें दिल्ली न जाये बाजी नाटी रें रागा ॥ ५

नई रोही अने जौघे रे पोलई माण्हू गोणुई आस ।

बणे बेहणी भाई बराबर फीरे आसरे भासा ॥ ६

हुई भादरा दुरगा हलियाबाई भांसी री राणी ।

विजें लछमी इंधरा गांधीऐ फूकी बेरी रीफागा ॥ ७

धीनी अने पंचाइत मिबरी भारत सरकारे ।

आज बेटडी गोणुई माण्हू हुआ देश चुआघा ॥ ८

द्रोही केरीऐ केराम न्याऊं ने नई तरफदारी ।

वारे हेरदा कौशू नराइण पारे माहुटी नागा ॥ ९

बूरा हेरीत बूअद मरधो आसें मजती आई ।

रली बणीऐ लाका बणाणा सा जंढी फूलै री बागा ॥ ११

साड़ी जेही मूं माण्हू बेवशै रीशू णा गल न मूली ।

न्याऊं केरीऐ भारत माता रा होला सदा मुहागा ॥ १२

छुंघ छेड़—४१

छुंघा छेड़ें रे बहमी लोको सारी दुनिया हेरा ।

कलिजुगा नबाड़िऐ आऊ सतीजुगे रा फेरा ॥ १

लमे चौउड़ै एई संसारा न शोउ शीठ सी देशा ।

सारं लोकां सी एक बराबर चाह कोई बी भेशा ॥ २

खोई लागी म्हारे हिण्डुसताना बे बोदू धर्मा जाती ।

गला गला पीछे बौजिए डाहेंदे सोरै टबरा नाती ॥ ३

एकी गवर मिटे रे गाभरू भगवाने र बेट ।

सोरै भाई हरिजन सवरण कीबी केरने फेट ॥ ४

फेटे करे जुण आपणे घोरक वणे बररी सारें ।

श्रीधा मुख बौडिऐ पाऊ लाऐ घोरा न आरे ॥ ५

रूप रंग सी एक बरोबर एक जेही नुहारें ।

मोथे बांधे नई कोसी रें लिखी रा कुण खरें ता माडें ॥ ६

जुण माण्डुए बाहंका केरु नई देखा नै बुरा ।

देऊ एजा सी बाहंको भीतरें तने बणा सी गूरा ॥ ७

कुल बौसुआ शोठा करोड़ा न पंद्ररा करे न भागें ।

एकी जौव रा फाखरा मुख कंठे सोकला आगे ।

जे नाम थी साधु महातमे देशासुखरदं आऐ ।

ऊबडें नीशटें हिन्दु समाजें कोम तीनरें गुआऐ ॥ ८

ऊबडें नीशटें छेत कमोणे नै जडें होआ सी बूरें ।

तौंडा बिगडू आसरा मुख जाती पाती कसूर ॥ ९

शूची खाईणू आली चताणे नै, बाहंको लोको रा एका ।

हरिजन नां गांधीऐ डाहू नई कोसी रा ठेका ॥ ११

कोम केरदं बाहंकी जाती र, रोहै बाम्हणा शूची ।

छोड़ू बाहंको आपणा पेखा नै नई गौणुए शूची ॥ १२

धीनी ईना नै कीनी रिआईती पीछे बाहंको रोहै ।

भेद नई सरकारा नै कोसी रा खर खोटें नी कोहै ॥ १३

पौजा गूठी साही एक बराबर आमा बापू नै भूरी ।

घाटा केराम सोरें भरारू नै तीना लागणी बूरी ॥ १४

जाइदात जुण बापू री सीभी भाईरा बांडा ।

हेसा बेवशा भाउ रा मारिए नई घौड़नी चांडा ॥ १५

पचाइती शेंबली लोकसभा री मिबरी नंबर दारी ।

धीनं मर्जाफें ता शोहर पौडिऐ डाही नोकरी न्यारी ॥ १६

दसा बीरशा न ठीमको लोड़ी जूणा आगे सी लोका ।

पौड़ी खटीए ठीमका आगले छोडा नशै री पोका ॥ १७

आपू मौंभ रोहै उबडें निशटें आजा तौयें सी जडें ।

एका नई जने आपू न बाहंको होरा मिलली कंठे ॥ १८

दौत—४२

सूते दे भाइयो द्वार घुमाड़ा दुनिया बागी आउधियाड़ा ।

घुणिए भले री गला फिमाड़ा उठिए आगला कोम नुआड़ा ॥ १

उदमी लोका ता पहिले जागे छेता ताखीलें रें कोमा न लागे ।

सोइया रीहें आसी नभागे लोका ता निकले केबड़ी आगे ॥ २

पेहिले छोड़णी गंदी रुआजा रांभड़े मनणे जातर साना ।

नशे न खोणे नी बोगत नाजा खटिए छपिए बणना राजा ॥ ३

शोभला देश सा पोजणू माटा खटणु आले बणाइ रियाटा ।

सेरीन नाजा ता ओकती फाटा कोसीनी चीजेरा आसा बे घाट ॥ ४

गूगल धूप ता कीडू पतीशा शीठ जलाडो ता कोकड़ी बिशा ।

शिगली मिगली भोरुई दिशा कोतबे उठणा केरिए रीशा ॥ ५

दुख दलिदर धीरनी बोथा उदम केरिए जिंदगी सोथा ।

बेवशा हूणदा जोड़िए होथा आपणी कलमे लिखणा मोथा ॥ ६

रछ-बणाहड़ी-सप्ताह—४३

होथ खडी रा हफता लागे डे जागे सीदे शे रें भागा ।

केरा चिकट कांघे बरुएं बे सारे बणाहड़ी जागा ॥ १

म्हीन कपड़ा बूणा थी शोभला म्हारा हिन्दुसताना ।

कोन्ही गूठी री मूंदड़ी निसरे मल मलेरें थाना ॥ २

होथ कोतिए बूणा थी घोरान म्हारे कूलू रें कोली ।

मूठी ओपड़े चाघरु बूणा थी नालू ओपड़े चोली ॥ ३

धन म्हारेआ कूलू रें मुलखा होथ रछ रें देशा ।

सिभ बुणदे पंडत ठाकर नई बाहंका पेशा ॥ ४

घोरा घोरा न ऊना कपाह थी, घोरा घोरा थी कोता ।
फोना बूणा थी पूंवे बणाहड़ी, छीने फेरा थी शेता ॥ ५

जने नोरें लागे फोनदे बणदे कारखाने मशीना ।
फीरे पूंवे जलाहू नकारे डें जीणा कीजिए ईना ॥ ६

शौउ सैंकड़े माण्हू रा कोमता एकी माण्हूए थोम्हू ।
मारु रिजक जीना गरीबे रा तीनरा कौकडु कोम्हू ॥ ७

एसा गला फिबाड़दे जाणदे कांगरेसे रै नेता ।
होथ कोतुआ खदर लाऽसी छापू रौंगुआ शेता ॥ ८

एई हफतें रा मनशा अंढा सा होथ बुणुआ लाणा ।
जीण देणा बणाहड़ी पूंवे ने तहाँ तने बशाणा ॥ ९

कंढे शोभलें बुणदे लागीरै, रंगदार बणाई ।
जीण सोयुआ बुणनू आलें रा, जब लागी कमाई ॥ १०

दूर कीजी बें घोरा न हेरात, होछ होछणे शोरू ।
लागे बुणदे शोभली शाला ते, जूणा चारा थी गोरू ॥ ११

शौउ सैंकड़े लागी रें रिजका, जूणा गरीब लोका ।
बेल्है फीरा थी ढबुए खेल्हीदै, नी ता मारा थी पोका ॥ १२

म्हारें देशै रा कोतुआ बुणुआ, मनु सारें संसारै ।
होथ खड़ी री दौलत अबे बी, चोलू समुदरा पारै ॥ १३

जीना लोकें रा रिजक निभु थी, तीना बेबशे री तीयें ।
होथु कपड़ा केरु रिआइत, सरकारें मसीयें ॥ १४

मशीनी खाद—४४

गूणा कूलू र संधीओ जीमीन भौरा खाद मशीनी ।
थींधी फेरा सा पौजणू जीमी बी जंढा चोपड़ चीनी ॥ १

भूखी रोही जने माण्हू रो काया ता बाहें एजा सी दौना ।
भूखी जिमी बी भोकरी फीरा सा पौजा किछ नीं होदा ॥ २

पहाड़ी जीमी सा रुसा मरीकें बी पौजा पदरा गूणा ।
धीनी जीमी बे पूरी खराक ता केरु खेऊ बी दूणा ॥ ६

जुग लागा अने सांडसी आले रा सभ गला सखाली ।
जूनी गोभुई आवली समेरी मूंडा साम्हने भाली ॥ ४

डाकधरें ईने सांडसी आलें ए सारी चीजा फियाड़ी ।
जूणा चीजा जौखें घाउड़ी फीरी तेहै तोखी पियारी ॥ ५

घीउ घटु ता डालडा बणू काया फीरी बी थींधी ।
मोल घटु ता खाद बणाइए बाभी गोरुए सींधी ॥ ६
घौणी बिसुआ भोरुई देशान जीमी तेतरी रोही ।
पेट पौजणू बांढी जमीना ऐ गल सोठणी पौई ॥ ७

भौरा मोल ता घाह दहबड़ा गढ़ पाय चकेरा ।
माटे खोटिए भरकू जने लेयें छेतान पेरा ॥ ८

थोड़ी घणी जे कसर रोही ता पाणी खाद मशीनी ।
मसी कसी ईने साँइस दाने पंदा केरिए धीनी ॥ ९

नीबी चीजा बे घौड़ा सी चांडा आसी कूलू रं लोका ।
सभी कौमा ने भूका सी पीछें न जने फोरें पराणे ॥ १०

भूरी दाह मू बे आपणे देशेरी गोड माण्हू बे वश ।
लोका गोए आसी जफड़ नीरें तने लागी कदशा ॥ ११

बौणरी फराध—४५

म्हारें देशें रें भाइयो कथा बौणो री यूणा ।
 कथा गुणिए नीहचें सेंघें मना भितरें गुणा ॥ १
 बौणा लाए परमेसरें आसरें जडी नाजो री सेरी ।
 बौणा बूटीए आसरें देशो री वडी रखया केरी ॥ २
 ईना बौणे री दोलत आसरें पोए बाजो रें कोठे ।
 जबो ईना नो काटिए शोटाम रोणा लेबडें ओठें ॥ ३
 गाश पाणी कुल बौणे री दोलत सेंघे ढोका सी माटा ।
 माटा इडिऐ नाला नो जाना ता जीमी होणी छणाटा ॥ ४
 बडी माल सी आसरें देशो री फोला बौण रें बूटे ।
 एई घने सी दोलत आसा नो मीले सुखे रें भूटे ॥ ५
 काठ कूणिए घोर नी चीणना काठ ढाली रा लाणा ।
 बोहू लकडी लाणी सा जंढा जो मास आपणा खाणा ॥ ६
 दादें बाबो जुणा बूटी टकाई तेकोमा आसरें आई ।
 आसो आपणे जाए री तौइए होर लोडी बधाई ॥ ७
 गल एतरी बोहू की छूणनू गोक माण्हू बि वशा ।
 होखी मीटीए काटाम बौणाता होणी म्हारी कदशा ॥ ८

खबदार—४६

निभदे लागे बौणा लोको फिटदे लागे बौणा ।
 आपू ता जिए थी रांभडें ता आगली खाचान पोणा ।
 नांगे केरले देशा नो तबो सा खडी बांही एं रोणा ।
 बौण पौडदें पातलें लागे देश फिरदा घोणा ।
 भांडे घोरें रें बेचिए जंढें लाऊ ढुअ्रा कमोणा ।
 बौणा निभिए मुलख यारो पोणा छाणकें छोणा ।
 बूटें रोहात पंदरा तबो एक शोहरू जोणा ।
 नई देश बेवश जुआडना लोहू पाणी न घोणा ।

नशा—४७

शुणा माणहुओ सारै संसार रै, मता केरदे नशा ।

नशा केरिया जानी री माले री, खोणी घोर री दशा ॥ १

मिलू जनम माण्हू रा आसा नै, सीभी जीवा न खरा ।

जीभ हुणदी अकल सोठदी, होथ कोमा नै हेरा ॥ २

सारै जीऊ सी माण्हू रे वशा न, ऐसा बुद्धि रै जोरै ।

ऐसा लायें सा माण्हू री तागत, भालू ब्राध बी डोर ॥ ३

ऐसा बुधिए भालात माण्हुएं छुंघे सरग तारै ।

कंढी-कंढी बणी कला मशीना ता बडैं जीउ बी हारै ॥ ४

नशा मारा सा माण्हू री अकल, बुध फेरा सा पीछे ।

बुधी मारीऐ माण्हू नी रौहँदा, नई पयाड़दा किछ ॥ ५

भलो बुरै रा नफ ता घाटे रा थोघ लोजे रा छूटा ।

मशी आले रा मान न धरम, नाता देवा रा चूटा ॥ ६

गोरु भेड़ा ता बीर्ण रें जीवा न थाल्है पूजा सा माण्हू ।

तबै रोहू सी कीजीरा माण्हू जै भला बुरा नी जाणू ॥ ७

नशा केरीऐ बणा सी पागल जीसे कीसे सी पोड़ा ।

गाल दोपड़ी बीसी पटाकी नै होरा लोका सी घोड़ा ॥ ८

भलो माणसा घोरें रें टबरा सरकार दर्बाग ।

नशी आले रा इज्जत मान नी, सभी जगा पतारा ॥ ९

एकी घेर नगे माण्हू री खाखी न लागी कोई बी नशा ।

सूर, चाकटी, भोग, शराब सी केरा माण्हू बेवशा ॥ १०

परुआरै रा स्हाब—४८

जेतरी चीजा पियारी संभारा न सीभी न बध लुआद पियारी ।

गाभरु, बेटी कलेजे रें टुकड़ें दाह सा तीनरी पुठी नुमारी ।

दुख कलेश सा बितरा माण्हुएं भालीऐ तीनरी होसदी नुहारी ।

कीजीनै टबर दोलत कोठी सी बाभी लुआदिए सभ नकारी ।

संसार सा लुआदिऐ लुआद पे संसार सा ।
हुई बित्ता बाहंती ता बिगड़ा सुआद सा ।

जे नाम बीजा सी पियारी एसा दुनिया न ।

लवाद तीना सीभी मौभे बधकी पियारी सा ।

होआ बेटी गाभरू सी कालजै रं टुकरे सा ।

भूरी दाह होआ बाल बचैरी निबारी सा ।

दुख ता कलेश काया मन रं बसारिया सी ।

होसदे जे भाले खिला मन री कियारी ता ।

कीजीगे ते टबर जमीना धन मान सी ।

लुआदी बाभी दुनिया ऐ बिधकी निहारी सा ।

लुआद मनी दुनिया री पहली मुराद सा ।

हुई बित्ता बाहंती ता बिगड़ा सुआद सा ॥ १

एकी जीड़ी दूहरू रा नौउचा वियाह केरू ।

खाणे लाणे होसणे रं मजे रं बियाड़े थी ।

एकी होरी घटी नई रोहिदा थी एक घड़ी,

अंदे मन मौउजी न सुखी लाड़ी लाड़े थी ।

खरा लाणा खाणा ब्याह जातरा न एणा जाणा,

नौचणा ता गाणा मन मजे रं लियाड़े थी ।

लागा ता एजदा पराहुणा बघाई आला,

हुई किछ खुशी किछ नाक मोथें भाड़े थी ।

अढी ऐ बघाई साई देऊरा प्रसाद सा,

हुई बीत्ता बाहंती ता बिगड़ा सुआद सा ॥ २

तबी लागे जौमदे लंगीर लायै तदा साल,

होर एणा पेटा न जां एक हाजी फाड़े थी ।

पौजा छौहा बोगशा न जौमी चार बेटे बेटी,

चारै मेढे अंदे सारै नखरे बगाड़े थी ।

चढ़दी जुआनी लोभा चाऊरें धियाडें मोभें ।
चेथुऐ ते चारें सिभ पिसरें फियाडें थी ।

बालक बरेसा न सौ लोभी जोड़ी बुढलुई ।
नुहार घाट आपणे ता बचे रं बी माडें थी ।

अढ़े ता सा होआ बचा बड़ी जायदाद सा ।
जोमें बीता बाहंतौ ता बिगड़ा सुआद सा ॥ ३

रौही साल घौणी होंदी पीउंली नबीज कम
जोर साल ढोला पौड़ा गल मशहूर सा ।

फोल लागे घौणे जने होणे होछ होछणु ता ।
भारा सेंधे डाल चूटी बाणे बस्तूर सा ।

तंडे घौणे बचे होंदें दुबल नकारें रोगी ।

चोड़ा आमा बापू बै लुआद भर पूर सा

सौहै साल फोल ता लुआद होणी बड़ी बाकी ।

जुण डाही स्हावै तेसा आचीणा जरूर सा ।

ढाल री लुआदै सारा टबर अनाद सा ।

हुई बीता बाहंतौ ता बिगड़ा सुआद सा ॥ ४

कोई माण्हू बोहू जीमी जगा ता बगीचे आला ।

खांदा पींदा जड़कदा बडा जिमीदार बी ।

गोरु भेड़ा हाली ग्पाले टबर कमौणू आल ।

ढवा घेला नाज पोथा खरा घोर बार थी ।

हुई भाई बेटड़ी ता नौऊ जोमें बेटे बेटी ।

न्हूसा पोचू पोची आला भौरी परआर थी ।

हुई दस बांडा तबे फूटा भौरी भांडा सोत ।

बीधे आला रोहू एक एक हेसे दार थी ।

बची लाये बरकत फोका बकबाद सा ।

हुऐ बीता बाहंतौ ता बिगड़ा सुआद सा ॥ ५

घोरु लड़ाई—४६

देश रें लोको खबरदार फौजजा आई होआ तियार
फौजजी भोसए जंढ शलोहै सीभी रें घोरा न तूरीए रोहै
बेटड़ी मरघ कठ पियार देश रें लोको खबरदार फौजजा-० ॥ १

शार्धे नी तोणे नी आपूहै तूरें खोखन गोभुए सूने रें छूरें ।
होसदे खेल्होदे केरदे मार देश रें लोको खबरदार फौजजा आई होआ तियार ॥ २

घोरा ब एक ता नाजे रा तोड़ा तीनेरें भेली पजेरीणा थोड़ा ।
कीजिए बाचणे भोंख गुआर देश रें लोको खबरदार फौजजा आई होआ तियार ॥ ३

होरा बलागणे बेशीए खाणा सोभला कपड़ाती ना नन्याणा ।
खोखी न पीठीन घूघू गुआर देश रें लोको खबरदार फौजजा आई होआ तियार ॥ ४

घाचदे पालदे आद दियाई कोम बलागिए जूनी दियाई ।
टबरा सारें री खोई नुहार देश रें लोको खबरदार फौजजा आई होआ तियार ॥ ५

देंदे नी बेशणे रातीनी सोणे भीतरे बाहरे चौकिए ढोणे ।
करड़ी ईनरी पाला बगार देश रें लोको खबरदार फौजजा आई होआ तियार ॥ ६

जीमी रा बाज ता काया रा मास खाइए केरा सी सतियानास ।
बोगती एतै रा केरा बचार देश रें लोको खबरदार फौजजा आई होआ तियार ॥ ७

फौजजी कूणा सी केरात आद बीता न बाहंती जुण लुआद ।
बोगती एतै रा केरा बचार देश रें लोको खबरदार फौजजा आई होआ तियार ॥ ८

पाका ता चीने री गल सा थोड़ी घोरे री फौजजा ठाकुई लोड़ी ।
मार करारी ना तोफ तलार देश रें लोको खबरदार फौजजा आई होआ तियार ॥ ९

एता न बचणा लाज कराये अक्षपताला न प्रेशन कराये ।
बचै रा आपणा देश रा उधार देश रें लोको खबरदार फौजजा आई होआ तियार ॥ १०

खापरो शोहरी—५०

आलीकाया मेरी दूधे रे दौदडू जानू मानूएं घेरी ।

मना भोरिऐ बहोसुआ नखेलुआ कंढी विपत्ते पेरी ।

काला लीये थी खेलीदी पटकदी घोरा बोणा ता सेरी ।

भोर खेला न खोई ग्रामा बापुऐ लोभें शाहूर पजेरी ॥

कंढी शोभली जोड़ी थी डें आसरी लोभ शोभ नी केरी ।

सूजी सूजीऐ ईसी हाऊ लोचुई कोमै जोड़ी थकंरी ॥

लोभ चाऊ नी हुआ मरै बचुओ चेना तोलू पगेरी ।

सोठा मंतर आसा बी बचाणेरा गुणा घरजा मेरी ॥

बचणे री सलाह—५१

बची जाणा भाई भी बची जाणा बोबी जी ।

राजी रोणाहाः केरी हाः केऽरी जाणा बची ०

बच जमोणे दूई तराई जीण बणाणा भोरा ही जीण बणाणा घोरा ।

मजै सेंधे ज्याई लेणे ज्याई लेणे ज्याई जेम सेंधे ज्याई लेणे ॥ २

बोहू जेम ता डाक्टर पुछणे लाज कराणा पूरा हो लाज कराणा पूरा ।

छेकें जाई लीणा जाई लीणा जाई छेको छेको जाऽई लेणा ॥ ३

जगान कम्प जे लागदे सीरा कटांदे हो नूपा लुआंदे हो ।

आपू जाये लाई लेणा लाई लेणा लाई आपू जाये लाऽई लेणा ॥ ४

वधदे चोर री ऐ बरकतिऐ ढाली लोड़ी दरशण तेरें भलिए । १

स्थाने रे लोड़ी बेटी गाभरू जेमै कीरडू नी लोड़ी टंबरेली भलिए । २

धाची पडाइए माणूह बणाइणे दूई तराई जी जमे रे भलिए । ६

हुए नकार तबी फौजजा चिधिए कारी रे ता दूई बीब तेरें भलिए । ४



THARAH KARDU

प्रकाशक :—

चन्द्र शेखर बेवशा

ढालपुर, कुल्लू (हि० प्र०)

THARAH KARDU

मुद्रक :- ठाकुर प्रिंटिंग प्रेस, ढालपुर, कुल्लू ।